

TULAFONO TAU FAAOFI O LE FAAFOEGA O TAALOGA ESEESE TAU TUPE 2017

SAMOA

Faamatalaga e Faamalamalama ai

1.0 Sini ma mafuaaga:

- 1.1 Ua taumafai le Tulafono Tau Faaofi o le Faafoga o Taaloga Eseese Tau Tupe 2017 (“Tulafono Tau Faaofi”) e faatonutonu faaletulafono o taaloga eseese tau tupe ma faamautu o ia mataupu e pei ona sa aiaia i lalo o Tulafono ia o le a faapea ona soloia e leni Tulafono Tau Faaofi.
- 1.2 O sini nei o le Tulafono Tau Faaofi:
 - (a) ia faafoe le faagaoioiga o taaloga ma taaloga eseese tau tupe;
 - (b) ia taofia ma faaititia o lamatiaga e mafua mai taaloga eseese tau tupe;
 - (c) e faatagaina ai nisi ituaiga o taaloga eseese tau tupe ma faasaina ai foi o isi ituaiga o taaloga eseese tau tupe;
 - (d) ia faalauiloa ai o taaloga eseese tau tupe e lelei ona fuafuaina ma le lē faaituau;
 - (e) e faatapulaaina ai o avanoa mo solitulafono ma uiga lē faamaoni e fesootai ma taaloga eseese tau tupe; ma
 - (f) ia faamautinoaina le faaogāina lelei o tupe e maua mai i ia taaloga eseese tau tupe mo faamoemoega o tagata lautele.

Fuaiupu:

**VAEGA 1
FAATOMUAGA**

- Fuaiupu 1:** - ua aiaia ai mo le igoa puupuu ma le aso e amata faamamaluina ai le Tulafono Tau Faaofi.
- Fuaiupu 2:** - ua aiaia ai mo sini o le Tulafono Tau Faaofi, o le faafoega o taaloga eseese tau tupe, o le taofia ma le tuuititia o tulaga lamatia e mafua mai i taaloga eseese tau tupe, o le faatagaina ma le faalauiloaina o taaloga eseese tau tupe ma isi tulaga faapena.
- Fuaiupu 3:** - ua aiaia ai mo faamatalaga o uiga o nisi fuaitau o faaaogāina i totonu o le Tulafono Tau Faaofi.

**VAEGA 2
O LE PULEGA E FAATONUTONUINA
FAALETULAFONO O TAALOGA TAU TUPE**

- Fuaiupu 4:** - ua aiaia ai mo galuega tauave ma malosiaga o le Pulega.
- Fuaiupu 5:** - ua aiaia ai mo malosiaga o le Ofisa Sili o Pulega.
- Fuaiupu 6:** - ua tuuina atu ai malosiaga i le Ofisa Sili o Pulega, e faamatuu atu ai so o se tasi po o ona malosiaga uma i lalo o le Tulafono Tau Faaofi i se tagata ofisa o le Pulega.

**VAEGA 3
FAIGA E FAAFOE AI
TAALOGA ESEESE TAU TUPE**

- Fuaiupu 7:** - ua aiaia ai o ituaiga taaloga eseese tau tupe e faatagaina ma faasaina i lalo o le Tulafono Tau Faaofi.

- Fuaiupu 8:** - ua faasaina ai se tagata i lalo ifo o le 21 tausaga le matua, mai taaloga eseese tau tupe.
- Fuaiupu 9:** - ua faasaina ai nisi meataitasi ma auaunaga mai le faaaogāina e avea o ni faailoga po o tau i mo taaloga eseese tau tupe, lea e aofia ai, oloa tau tapaa, ava malosi, fana, auaunaga tau faiga aiga matagā, fanua faaleaganuu, tupe tologi faaaogā ai masini feaveai tau fesootaiga, pule i se fanua ma meataitasi taua o anamua.
- Fuaiupu 10:** - ua aiaia ai e faapea o so o se tagata ua faamoemoe e faatino o se taaloga tau tupe e tatau ona tuuina atu o se “faamatalaga o le faamoemoe ua faatagaina”, i le Pulega. O se faamoemoe ua faatagaina o lona uiga o se taaloga tau tupe mo se faamoemoe o galuega fesoasoani, e lagolagoina ai se ekalesia po o se faalapotopotoga faale-lotu, o se faamoemoe e lē aafia ai se pisinisi, ae e manuia ai le aotelega po o se vaega o tagata lautele, o se kalapu po o se faalapotopotoga o saili tupe mo le manuia o ona sui auai ma so o se isi lava faamoemoe ua faatonuina e Tulafono Faatonutonu.

VAEGA 4

PETIPETIGA I MASINI

E FAAMAU AI PETI TAITASI

- Fuaiupu 11:** - ua aiaia ai mo le faia o se masini e faamau ai peti taitasi o petipetiga, lea e tatau ai i se tagata ona ia tuuina atu o se “faamatalaga o le faamoemoe ua faatagaina” mo sea faatinoga. Ua faapea foi ona aiaia i lenei fuaiupu, o faamatalaga o uiga o fuaitau e faasino i le faatautaiga o petipetiga i masini e faamau ai peti taitasi. I le ma lea, ua faapea foi ona aiaia ai e faapea, e mafai e le Pulega ona faia o se maliega ma se isi atunuu e faatautaia pe saunia o petipetiga i masini e faamau ai peti taitasi.

- Fuaiupu 12:** - ua faatagaina ai petipetiga i masini e faamau ai peti taitasi ina ia faia i nofoaga ua faamaotiina, e ese mai ai i malae tutuu i totonu o Samoa.
- Fuaiupu 13:** - ua aiaia ai e faapea, e faatoa mafai lava e le Pulega ona taliaina o Petipetiga i masini e faamau ai peti taitasi, i se ofisa faatagaina po o se lala sooupu o le Pulega ma tulaga aliae mai ma faataitaiga e mafai ai e le Pulega ona taliaina o petipetiga i masini e faamau ai peti taitasi mai se tagata.
- Fuaiupu 14:** - ua aiaia ai ai mo tulaga aliae mai po o faataitaiga, lea e mafai ai e le Pulega po o se masini e faamau ai peti taitasi ona tuuina o se peti na te taliaina i lalo o le Tulafono Tau Faaofi.
- Fuaiupu 15:** - ua aiaia ai e faapea, e mafai ese tagata ona talosaga i le Pulega mo se laisene e faagaioia ai se masini e faamaumau ai peti taitasi ma tuuina atu malosiaga i le Pulega e taliaina ai se talosaga ma tuuina atu o le laisene.
- Fuaiupu 16:** - ua aiaia ai mo tuutuuga e faasino i petipetiga e ala atu i le Pulega.
- Fuaiupu 17:** - ua faasaina ai se tagata e i lalo ifo o le 21 tausaga le matua, mai le faia o se peti e ala atu i le Pulega po o i se masini e faamaumau ai peti taitasi ua laiseneina.
- Fuaiupu 18:** - ua noatia ai le Pulega ma se masini e faamaumau ai peti taitasi ua laiseneina ina ia totogi tupe o tufatufaga i se taimi vave lava e mafai ai, i le maea ai o se tuuga.
- Fuaiupu 19:** - ua aiaia ai e faapea, afai e leai se peti e malo i se tuuga, o le aofaiga sa tatau ona maua mo le tufatufaina atu e avea ma tufatufaga, e mafai ona avea ma vaega o le aofaiga o mafai ona maua mo le tufatufaina atu o tufatufaga i luga o i si peti.
- Fuaiupu 20:** - ua faia ai o se soligatulafono, pe afai e faatagaina ese tagata le totogiina atu o se tufatufaga po o se tupe toe faafoi, e lē o tusa ai ma le Tulafono Tau Faaofi.

- Fuaiupu 21:** - ua aiaia ai e faapea, e mafai ese tagata, e tusa ona fuafuaina e le Pulega, ona faavaeina o se teugatupe faa-aitalafu ma le Pulega.
- Fuaiupu 22:** - ua aiaia ai e faapea, e ao i le Pulega po o so o se masini e faamaumau ai peti taitasi ua laiseneina, ona tausia se teugatupe e taua o le “Teugatupe o Tufatufaga Tutusa” mo so o se tufatufaga e le i tapāina, lea e lē noatia ai le Pulega po o se masini e faamaumau ai peti taitasi ua laiseneina, e tufatufaina atu i lalo o lenei Vaega.

VAEGA 5

LOTO A LE ATUNUU

- Fuaiupu 23:** - ua aiaia ai mo le aiā tatau a le Pulega e faafoe ai taaloga o le loto a le atunuu ma i se faiga ua manatu le Pulega ua talafeagai ai.
- Fuaiupu 24:** - ua tuuina atu ai malosiaga i le Pulega e tofia ai sooupu e faatauina atu, mo taaloga o le loto a le atunuu ua faamaonia ma ia totogi e le Pulega o se komisi po o se totogi i ia sooupu o faatauina atu le loto.
- Fuaiupu 25:** - ua aiaia ai e faapea o tupe alu e faasino i le faafoega o taaloga o le loto a le atunuu, e mafai ona totogiina mai tupe a le Pulega.

VAEGA 6

TAALOGA LŪLŪ

- Fuaiupu 26:** - ua aiaia ai e faapea, o le faafoega o se Lūlū e ao ona laiseneina e tusa ai ma le Tulafono Tau Faaofi ma ia faafoeina i se faiga ua fuafuaina e le Ofisa Sili o Pulega. Ua faapea foi ona tuuina atu ai malosiaga i le Ofisa Sili o Pulega e fuafuaina, faamaonia ma faaaogā nisi tuutuuga e faasino i le faafoega o le lūlū.

- Fuaiupu 27:** - ua aiaia ai e faapea, o talosaga mo se faamaoniga e faafoe ai se lūlū, e ao ona faia i le Ofisa Sili o Pulega ma e ao lava foi ona ausia manaoga ua aiaia i totonu o lenei aiaiga. Ua faapea foi ona tuuina atu ai malosiaga i le Ofisa Sili o Pulega e talia pe teena ai se talosaga mo se laisene o se lūlū.
- Fuaiupu 28:** - ua aiaia ai e faapea e ao ona se'iina se lūlū i se faiga ua faatonuina e le Ofisa Sili o Pulega.
- Fuaiupu 29:** - ua aiaia ai e faapea, e lē tatau ona se'iina o se lūlū, seia vagana ua maea ona faatauina atu o pepe lūlū uma. Ona pau o le tuusaunoaga, pe afai ua faamalieina le Ofisa Sili o Pulega e faapea, o pepa lūlū e le i faatauina na leiloloa i le taimi na faaoo atu ai i sooupu e faatauina atu ma tuuina atu ai malosiaga i le Pulega e faataatiaese ai o lenei manaoga.
- Fuaiupu 30:** - ua aiaia ai e faapea, e ao ona se'iina o lūlū a o auai ni leoleo se toalua, ma o se tasi o i la'ua e tatau ona umia le tulaga tofi e lē i lalo ifo i lo le tofiga o le Satini Sinia.
- Fuaiupu 31:** - ua aiaia ai e faapea, o le se'iina o se lūlū e ao ona tatala i le atunuu lautele ma e ao ona faasalalau le taimi ma le nofoaga po o le faailoa atu i se faiga ua faamaonia e le Ofisa Sili o Pulega.
- Fuaiupu 32:** - ua aiaia ai e faapea, e tatau i se kamupani ua laiseneina ona saunia o se faamatalaga ua faamaonia o faatulagaina ai o taunuuga o le se'i ma tuuina atu lea faamatalaga faamaonia i le Ofisa Sili o Pulega, i le taimi lava e maea ai le se'i. A faamaonia loa e le Ofisa Sili o Pulega, ona avea loa lea o le faamatalaga faamaonia ma taunuuga aloaia ma e ao loa ona totogiina atu o faailoga tupe e tusa ai ma taunuuga ma e ao ona faasalalauina ma faailoa atu i se faiga ua faatonuina e le Ofisa Sili o Pulega.
- Fuaiupu 33:** - ua faia ai o se soligatulafono, pe afai o se tagata ua na faamaopoopoina, faalauiloa po o ua ia fesoasoani i le faamaopoopoina o se lūlū e le i laiseneina po o pe afai ua lē

mafaia ese kamupani ua laiseneina ona usitaia o se tuutuuga o se laisene.

- Fuaiupu 34:** - ua aiaia ai e faapea, e na o se tagata na faatauina se pepa lūlū i se lūlū e le i laiseneina, e mafai ona talosaga mo le toe faafoiina atu o lana tupe po o seisi tau tau tupe mo le pepa lūlū na ia totogiina.

VAEGA 7 TAALOGA BINGO

- Fuaiupu 35:** - ua aiaia ai mo taualumaga ma manaoga e ao i se tagata ona ia faia pe a talosaga mo se laisene e faafoeina ai se taaloga bingo, ma tuuina atu ai le malosiaga i le Ofisa Sili o Pulega e taliaina ai pe teena o se talosaga e faafoeina ai se taaloga bingo.

- Fuaiupu 36:** - ua aiaia ai mo tuutuuga e lē toe aloaia ai se laisene e faia ai se taaloga bingo.

- Fuaiupu 37:** - ua aiaia ai e faapea, e ao ona laiseneina se tagata o tuuina atu oloa tau bingo. Ua faapea foi ona tuuina atu ai malosiaga i le Ofisa Sili o Pulega e faamatuu atu ai, teena po o le faalēaogāina o se laisene ma faaee atu o tuutuuga talafeagai i se laisene.

- Fuaiupu 38:** - ua aiaia ai e faapea, e ao i se Faalapotopotoga ua faamatuu atu i ai se laisene e faafoe ai se taaloga bingo, ona tofia se tagata e ofo mai e Lauina le bingo po o se tagata faamaopoopo na te faafoeina se taaloga bingo.

- Fuaiupu 39:** - ua aiaia ai e faapea, e ao i se tagata faamaopoopoina se taaloga bingo, ona tuuina atu i le Ofisa Sili o Pulega, ia lē itiiti ifo i lo 1 e 7 aso, se faasilasilaga o nisi itu taua o manaomia e le Ofisa Sili o Pulega.

- Fuaiupu 40:** - ua tuuina atu ai malosiaga i le Pulega e faia ai tulafono faafoe e talafeagai ma tuutuuga e taalo ai i le taaloga o le Bingo ma e tataui i le tagata o faafoeina se faasologa o le

bingo ona i ai ni tulafono e avanoa ai o se suesuega pe a talosagaina.

Fuaiupu 41: - ua aiaia ai se noataga i se kamupani ua laiseneina e tuuina atu ai i le Ofisa Sili o Pulega se faamatalaga o tupe maua ma tupe totogi e tusa ai o taaloga bingo na faafoeina.

Fuaiupu 42: - ua aiaia ai se noataga i se kamupani ua laiseneina e faafoe ai se taaloga bingo, ina ia tausia o ni faamaumauga tusitusia o mataupu o aiaia i totonu o lenei aiaiga. O ia faamatalaga e ao ona teuina mo se vaitaimi e lē itiiti i lo le 12 masina mai le aso na faafoeina ai le taaloga. O ia faamatalaga e ao ona faaavanoa mo le asiasia e le Ofisa Sili o Pulega, ma tuuina atu ai malosiaga i se tagata asiasi e asiasia ai nofoaga ma fale o faafoe ai bingo.

VAEGA 8

POLOKALAME FAALAUILOA O LE FAATAUINA ATU O OLOA MA AUAUNAGA

Fuaiupu 43: - ua faamatalaina ai le uiga o le “Polokalame Faalauiloa o le Faatauina Atu o Oloa ma Auaunaga” ma e tatau lava ona laiseneina ma faafoe i se faiga ua fuafuaina e le Ofisa Sili o Pulega.

Fuaiupu 44: - ua aiaia ai e faapea, e ao ona faia o se talosaga mo le faamaoniga e faafoeina ai se polokalame faalauiloa o le faatauina atu o oloa ma auaunaga, i le Ofisa Sili o Pulega ma ia ausia o manaoga o aiaia i totonu o lenei aiaiga. Ua faapea foi ona tuuina atu ai malosiaga i le Ofisa Sili o Pulega e taliaina pe teena o se talosaga mo sea faamaoniga.

Fuaiupu 45: - ua aiaia ai mo le metotia po o se faiga e ao ona tusia ai le polokalame faalauiloa o le faatauina atu o oloa ma auaunaga, ma o le metotia po o se faiga lea ua faamaonia e le Ofisa Sili o Pulega.

- Fuaiupu 46:** - ua aiaia ai e faapea, e ao i se kamupani ua laiseneina ona saunia se faamatalaga ua faamaonia, o faatulaga atu ai taunuuga o le se'i, ma tuuina atu i le Ofisa Sili o Pulega i le taimi lava e maea ai le se'i. A faamaonia loa e le Ofisa Sili o Pulega, ona aveva loa lea o le faamatalaga faamaonia ma taunuuga aloaia ma e ao loa ona totogiina atu o faailoga e tusa ai ma taunuuga, ma e ao ona faasalalau ma faailoaina atu i se faiga ua faatonuina e le Ofisa Sili o Pulega.
- Fuaiupu 47:** - ua faia ai o se soligatulafono, pe afai o se tagata o faamaopoopoina po o o uunaia po o fesoasoani i le faamaopoopoga po o le faalauiloaina o se polokalame faalauiloa o le faatauina atu o oloa ma auaunaga e aunoa ma se laisene, ma pe afai ua lē mafai e se tagata ona usutaia o se aiaiga e talafeagai i se laisene ua tuuina atu i lalo o lenei Vaega.

VAEGA 9

TAALOGA ESEESE TAU TUPE A KAMUPANI E TUUINA ATU AUAUNAGA TAU FESOOTAIGA

- Fuaiupu 48:** - ua faamatalaina ai uiga o fuaitau e faasino i taaloga eseese tau tupe a kamupani e tuuina atu auaunaga tau fesootaiga ma aiaia ai e faapea o ia taaloga tau tupe e ao ona laiseneina e tusa ai ma lenei Vaega ma i se faiga ua fuafuaina e le Ofisa Sili o Pulega.
- Fuaiupu 49:** - ua aiaia ai e faapea e mafai e se sui ua faatagaina o se kamupani e tuuina atu auaunaga, ona faia o se talosaga i le Ofisa Sili o Pulega mo se laisene e faafae ai taaloga eseese tau tupe po o gaoiga o taaloga tau tupe e ala i le faaaogāina o se masini tau fesootaiga po o faamatalaga faa-eletoroni.
- Fuaiupu 50:** - ua tuuina atu ai malosiaga i le Ofisa Sili o Pulega e faamatuu atu ai pe teena se laisene i lalo o lenei Vaega.

- Fuaiupu 51:** - ua aiaia ai e faapea so o se tupe e maua i sailiga tupe e ala i gaiioiga o taaloga tau tupe ua laiseneina, i lalo o lenei Vaega, o le a faaaogā e tusa ai ma le faamatalaga o le faamoemoe faatagaina na faamaonia ma e ao ona tufatufaina atu i totonu o le ono (6) masina mai le taimi na sailia ai tupe.
- Fuaiupu 52:** - ua aiaia ai se noataga i le kamupani ua laiseneina e tuuina atu auaunaga ina ia tuuina atu o taaloga taitasi o le a faaaogā i lalo o le laisene, i le Ofisa Sili o Pulega mo le faamaoniga.
- Fuaiupu 53:** - ua faia o se noataga faaletulafono mo se kamupani o tuuina atu auaunaga faaavanoa ai o se faiga e toe faamaamuluese ai, mo tagata taitoatasi o auai ai po o tagata o lo o faaaogāina se masini tau fesootaiga o faaaogāina mo se taaloga ua laiseneina. O se soligatulafono pe afai e faaauau pea ese kamupani e tuuina atu auaunaga ona faamalosia le auai i taaloga tau tupe, pe afai ua faaaogāina e se tagata o auai ai, le faiga e faamaamuluese ai.
- Fuaiupu 54:** - ua faia ai o se soligatulafono mo se tagata o ia lea o lo o faafoeina po o fesoasoani i le faafoeina o so o se taaloga po o so o se gaiioiga o taaloga tau tupe e ala i le faaaogāina o se masini tau fesootaiga po o faamatalaga faa-eletoroni e aunoa ma lona umia o se laisene aloaia ma o lo o faaaogāina i le taimi nei, na tuuina atu i lalo o lenei Vaega ma o se kamupani ua laiseneina na te faafoe pe fesoasoani i le faafoeina o ia taaloga ua na solia lava o se manaoga i lalo o lenei Vaega.

VAEGA 10
TULAFONO MO FALE O TAALOGA TAU TUPE

- Fuaiupu 55:** - ua faamatalaina ai le uiga o fale o taaloga eseese tau tupe. O le faamoemoe ina ia faamautinoa le mauaina o nofoaga faalilolilo faapitoa o taaloga eseese tau tupe, e aofia ai potu o fale faapitoa o aiga o lo o faaaogā mo taaloga eseese tau tupe. O lenei aiaiga ua faia ai e avea o se soligatulafono mo se tagata e tausia se fale o taaloga eseese tau tupe po o ma o so o se tagata o ia lea ua maua i totonu o se fale o taaloga eseese tau tupe. Ua faapea foi ona tuuina atu ai le malosiaga i le Pulega ma ana tagata Ofisa ma leoleo e sueina ai faamalosi o ia nofoaga.
- Fuaiupu 56:** - ua faia ai o se soligatulafono, pea fai ua aitalafuina e se tagata po o ua tuuina atu ni tupe mo le faamoemoe e faatuina ai pe faatinoina ai se pisinisi o se fale mo taaloga eseese tau tupe po o le faamanuiaina ai i ni tupe faasili mai sea pisinisi po o se fale mo taaloga eseese tau tupe.
- Fuaiupu 57:** - ua faasāina ai se tagata ona auai i taaloga po o taaloga eseese tau tupe i se nofoaga faitele ma tuuina atu ai malosiaga i se leoleo e pu'eina ai faapagotā sea tagata e aunoa ma se tusi faapoloaiga.

VAEGA 11
SAILIILIGA, SUEINA O TUSI MA
TUPE ALU FAAMAONIA

- Fuaiupu 58:** - ua aiaia ai se noataga i se tagata ua laiseneina e tuuina atu ai o faamatalaga i le Ofisa Sili o Pulega.
- Fuaiupu 59:** - ua aiaia ai e faapea, e mafai e le Pulega ona faaoo atu se faasilasilaga i se tagata ua laiseneina ina ia sueina faasuetusi e se tagata asiasi po o se suetusi ua faamaonia e le Pulega, o ana faamatalaga tau tupe, o faamaumauga ma

faamatalaga o taaloga eseese tau tupe mo le tausaga faaletupe.

- Fuaiupu 60:** - ua faasaina ai se tagata mai le taofiofia o tupe po o ni meafaitino e mafai ona faaliu-tupe ua maua mai taaloga eseese tau tupe, seia vagana ai ua faamaonia e avea o se tupe alu faamaonia e le Ofisa Sili o Pulega.

VAEGA 12

FOFOGAINA O MATAUPU A LE PULEGA

- Fuaiupu 61:** - ua tuuina atu ai malosiaga i le Minisita e fofogaina ai talosaga tetee po o le toe iloiloina o talosaga e faasino i se faaiuga a le Ofisa Sili o Pulega ua faia i lalo o le Tulafono Tau Faaofi.

- Fuaiupu 62:** - ua tuuina atu ai malosiaga i le Ofisa Sili o Pulega po o se tagata asiasi e suesueina o faaseā e faasaga i se tagata e uiga i le faafoega o so o se taaloga po o se taaloga tau tupe.

- Fuaiupu 63:** - ua tuuina atu ai malosiaga e faafoe ai se suesuega i so o se taaloga po o se taaloga tau tupe po o se gaiioiga faatino e faamautinoa ai le faalauiloa o taaloga e fitoitonu i ai ma taaloga tau tupe.

- Fuaiupu 64:** - ma aiaia ai mo se faaaliga e ao ona tuuina atu e tusa o le taimi ma le nofoaga e fofogaina ai se mataupu i lalo o lenei Vaega, i le tagata o faaseā, ma le tagata ua laiseneina o aafia i se faaseā ua faia i lalo o lenei Vaega. E ao i le tagata faaseā ma le tagata ua laiseneina ona tuuina atu i ai o avanoa talafeagai e tali mai ai. Ua faapea foi ona tuuina atu ai malosiaga i le Pulega e suia ai pe faalēaogāina o aiaiga o le laisene, taofia lē tumau, faalēaogāina, tuuina atu o se lapataiga, faaee atu o se faasalaga po o le teena o le faaseā.

- Fuaiupu 65:** - ua tuuina atu ai malosiaga i le Pulega e taofia lē tumau ai se laisene i le maea ai ona faatautaia o se suesuega i lalo o lenei Vaega. E i ai nisi manaoga faapitoa e ao ona

faamalieina e le Pulega a o le i taofia lē tumau se laisene i lalo o lenei vaega.

- Fuaiupu 66:** - ua tuuina atu malosiaga i le Pulega e faalēaogāina ai se laisene, i le maea ai ona faatautaia o se suesuega i lalo o lenei vaega. Ua faapea foi ona aiaia ai mo mataupu e ao ona iloiloina e le Pulega, pe afai e fuafuaina, pe o se itu e manuia ai tagata lautele pe a faalēaogāina se laisene i lalo o lenei Vaega.

VAEGA 13

AIAIGA E FAAMALOSIA AI

- Fuaiupu 67:** - ua faia ai o se soligatulafono, pe afai o se tagata ua na faia ma le loto i ai ma aunoa ma se mafuaaga talafeagai, e faalavelaveina ai se tagata asiasi i le faataunuuina po o le faatinoga o ona malosiaga po o tiute i lalo o le Tulafono Tau Faaofi.

- Fuaiupu 68:** - ua faia ai o se soligatulafono, pe afai o se tagata ua na faaoloatauaina o se tagata asiasi po o se leoleo, o ia lea o lo o faatino ona tiute i lalo o le Tulafono Tau Faaofi ma ua avea foi o se soligatulafono pe afai na taliaina e se tagata asiasi po o se leoleo o se tupe faa-ala-tua mai se tagata.

- Fuaiupu 69:** - ua tuuina atu ai malosiaga i se tagata asiasi po o se leoleo e faaoo atu ai se faasilasilaga o le solia o le tulafono i se tagata, o ia lea, ua na faia o se soligatulafono i lalo o lenei Tulafono Tau Faaofi po o Tulafono Faatonutonu ma o sea faasilasilaga o le solia o tulafono e ao ona faia i le pepa faatumu ua faamaonia e le Pulega.


- Fuaiupu 70:** - ua aiaia ai e faapea o se faasalaga ua faamaoti mai i totonu o se faasilasilaga o le solia o le tulafono, e ao ona i se aofaiga o le tasi-vae-lima o le aofaiga aupito maualuga o le sala tupe mo le soligatulafono ma o lea sala tupe e ao ona totogiina atu i le Pulega.

- Fuaiupu 71:** - ua aiaia ai e faapea o le totoigiina o le sala tupe e tusa o se faasilasilaga o le solia o le tulafono, e tatalaina ai so o se noataga tau solitulafono mo le soligatulafono o aiaia i totonu o le faasilasilaga.

VAEGA 14 AIAIGA ESEESE

- Fuaiupu 72:** - ua tuuina atu ai malosiaga i le Ofisa Sili o Pulega e faamaonia ai pepa faatumu mo faamoemoega o le Tulafono ma mafai ai e le Pulega ona fuafuaina totogifuapauina mo so o se faamoemoe i lalo o le Tulafono. O ia totogifuapauina e noatia ma fai fuafua i le Faamaoniga a le Komiti Faatonu o Tupe Maua a le Atunuu.
- Fuaiupu 73:** - ua aiaia a puipuigamalu mai noataga tau solitulafono po o noataga tau le va o tagata, mo tagata o faatinoina malosiaga i lalo o lenei Tulafono.
- Fuaiupu 74:** - ua tuuina atu ai malosiaga i le O Le Ao o le Malo e faia ai Tulafono Faatonutonu i luga o le fautuaga a le Kapeneta, e faatonuina ai Mataupu e faasino i le faatinoga o le Tulafono.
- Fuaiupu 75:** - ua aiaia ai mo aiaiga faasaoina ma aiaiga tau soloaiga e faasino i laisene po o pemitā e tuuina atu i lalo o Tulafono ua soloia ma so o se faaiuga, faatulagaga, ma iugafono ua faia e Komiti Faatino eseese i lalo o Tulafono ua soloia. O ia laisene, pemitā, faatulagaga ma iugafono e tatau ona faaaauau pea ona faamalosiā, seia vagana ai ua fuafuaina i se iai faiga e ese ai e le Pulega i lalo o lenei Tulafono.

Fuaiupu 76: - ua soloia ai le Tulafono o Petipetiga (Komiti Faatino o masini e faamauina ai peti taitasi) 1990, Tulafono o Taaloga 1978, ma le Tulafono o Lūlū a le Malo 1978.

A handwritten signature in black ink, appearing to read 'Sailele Malielegaoi', is written above a horizontal dotted line.

(Hon TUILAEPA Auelua Fatialofa Lupesoliai Lolofietele
Neioti Aiono Galumalemana Dr. Sailele Malielegaoi)

PALEMIA

**TULAFONO TAU FAAOFI O LE FAAFOEGA
O TAALOGA ESEESE TAU TUPE 2017**

SAMOA

Faatulagaina o Aiaiga

**VAEGA 1
FAATOMUAGA**

1. Igoa puupuu ma le amataga
2. Sini o lenei Tulafono
3. Faamatalaina o uiga o upu

**VAEGA 2
PULEGA E FAATONUTONUINA
FALETULAFONO TAALOGA ESEESE TAU TUPE**

4. Galuega tauave ma malosiaga o le Pulega
5. Malosiaga o le Ofisa Sili o Pulega
6. Tuuina atu o le pule faataga i lalo o lenei Tulafono

VAEGA 3**FAIGA E FAAFOE AI TAALOGA ESEESE TAU TUPE**

7. Pepa faatumu faatagaina o taaloga ma taaloga eseese tau tupe
8. E faasaina ona taaalo tamaiti i taaloga eseese tau tupe
9. Faailoga faasaina
10. Faamatalaga o faamoemoega faatagaina

VAEGA 4**PETIPETIGA E FAAAOGĀ AI MASINI
E FAAMAUMAU AI PETI TAITASI**

11. Faafoega o se masini e faamaumau ai peti taitasi
12. Petipetiga i masini i isi nofoaga e ese ai na i lo malae tutuu
13. Taliaina o petipetiga e faaaogā ai masini e faamaumau ai peti taitasi
14. Faiga o peti
15. Talosaga mo laisene e faafoe ai masini e faamaumau ai peti taitasi
16. Tuutuuga e faasino i petipetiga e ala atu i le Pulega
17. E lē faatagaina ona faia ni peti a tagata e le i atoa tausaga o le matutua
18. Tufatufaga
19. Aiaiga e faaaogā pe afai e le o malo ni peti
20. O soligatulafono e faasino i tupe e totogi ai peti ua malo ma tupe toe faafoi
21. Teugatupe faa-aitalafu
22. Teugatupe o Tufatufaga Tutusa

VAEGA 5**TAALOGA LOTO A LE ATUNUU**

23. O le aia tatau a le Pulega e faafoe ai le taaloga loto a le atunuu
24. Lala sooupu e faatauina atu pepa
25. Tupe alu lautele

**VAEGA 6
LŪLŪ**

26. Faafoega o lūlū
27. Laisene o lūlū
28. Auala e seiina ai lūlū
29. E lē seiina se lūlū vagana ai ua maea ona faatau uma atu pepa lūlū
30. Ia auai leoleo i le seiina o le lūlū
31. Ia avanoa tagata lautele e molimauina le seiina o le lūlū
32. Taunuuga aloaia
33. Soligatulafono e faasino i lūlū
34. Faatauina atu o pepa lūlū faasolitulafono

**VAEGA 7
TAALOGA BINGO**

35. Talosaga mo laisene o taaloga bingo
36. Tulaga lē aloaia o se laisene
37. Ia faia ni laisene o tagata o tuuina atu oloa ma auaunaga tau bingo
38. Tofia o le tagata e faamaopoopoina
39. Faamatalaga faapitoa e manaomia e le Ofisa Sili o Pulega
40. Tuutuuga o le taaloga
41. Faamatalaga o tupe maua ma tupe totogi
42. Faamaumauga ma faamatalaga molimau o le faafoega o bingo

**VAEGA 8
POLOKALAME E FAALAUILOA AI LE
FAATAUINA ATU O OLOA MA AUAUNAGA**

43. Faafoega o polokalame faalauiloa e faatauina atu ai oloa ma auaunaga
44. Laisene o polokalame faalauiloa o le faatauina atu o oloa ma auaunaga
45. Auala e seiina ai pepa ua faatau atu o polokalame faalauiloa

46. O faaiuga aloaia
47. O soligatulafono e faasino i pepa o polokalame faalauiloa

VAEGA 9

O TAALOGA ESEESE TAU TUPE E FAAAOGĀINA AI KAMUPANI E TUUINA ATU AUAUNAGA TAU FESOOTAIGA

48. O taaloga eseese tau tupe e faaaogāina ai kamupani o tuuina atu auaunaga tau fesootaiga
49. O laisene mo taaloga e faaaogāina ai masini tau fesootaiga
50. Faamatuuina atu o se laisene
51. Tufatufaga o tupe faasili
52. Faamaoniga mo taaloga
53. O le faamaamulu ese mai taaloga
54. O soligatulafono e faasaga i lenei Vaega

VAEGA 10

FAAFOEGA O FALE O FAIA AI TAALOGA ESEESE TAU TUPE

55. O fale mo taaloga
56. Aitalafuina o tupe mo se fale mo taaloga
57. O le taalo i taaloga eseese tau tupe i nofoaga faitele

VAEGA 11

SAILIILIGA, SUEINA O TUSI MA TUPE ALU UA FAAMAONIA

58. Ia tuuina atu faamatalaga e tagata ua laiseneina
59. Sueina o Tusi i Tulaga Lautele
60. E lē taofia komisi o tupe totogi

VAEGA 12
FOFOGAINA O MATAUPU E LE PULEGA

61. Talosaga tetee ma le toe fofogaina o mataupu
62. Ia suesueina e tagata asiasi faasea
63. Faalauiloaina o taaloga eseese tau tupe faatuatuaaina
64. Suesueina o mataupu e faasino i faasea
65. Taofia lē tumau o laisene
66. Faalēaogāina o laisene

VAEGA 13
AIAIGA E FAAMALOSIA AI

67. Faalavelaveina o tagata asiasi
68. O soligatulafono o le faaoloataua ma faamatalaga sese
69. Faasilasilaga tau tulafono
70. Faasalaga o le soliga o le tulafono
71. Aogā o le totogiina o sala tupe

VAEGA 14
AIAIGA ESEESE

72. Pepa faatumu ma totogifuapauina ua faamaonia
 73. Puipuiga faaetulafono mo tagata o faaogāina malosiaga i lalo o lenei Tulafono
 74. Tulafono Faatonutonu
 75. Aiaiga faasaoina ma aiaiga tau soloaiga
 76. Soloia o Tulafono
-

2017, Nu.

O SE TULAFONO TAU FAAOFI UA TAU

O SE TULAFONO e faatonutonu faaletulafono ai taaloga ma taaloga eseese tau tupe e fesootai i ai, i lalo o faatulagaga toefuataina faaletulafono, ma isi mataupu e fesootai i ai.

UA FAIA e le Fono Aoao Faitulafono a Samoa i totonu o le Palemene ua potopoto e faapea:

VAEGA 1 FAATOMUAGA

1. Igoa puupuu ma le amataga:

- (1) E mafai ona taua lenei Tulafono o le Tulafono o le Faafoega o Taaloga Eseese Tau Tupe 2017.
- (2) O lenei Tulafono e amata faamamaluina i se aso e filifilia e le Minisita.

2. Sini o lenei Tulafono

O sini o lenei Tulafono e faapea:

- (a) e faafoe ai le faatupulaia o taaloga ma taaloga eseese tau tupe;
- (b) e puipui ai ma faaititia aafiaga e mafua mai i taaloga ma taaloga eseese tau tupe, e aofia ai faafitauli o taaloga eseese tau tupe;
- (c) e faatagaina ai nisi o ituaiga o taaloga ma taaloga eseese tau tupe i lalo o faatulagaga ua faatonutonu faaletulafono, ma faasaina ai isi ituaiga o taaloga ma taaloga eseese tau tupe e lē manaomia;
- (d) ia faalauiloa ai taaloga ma taaloga eseese tau tupe faatuatuaina;
- (e) ia mautinoa ai le faamaoni ma le lē faaituau o taaloga tau matematega;
- (f) ia faatapulaaina ai avanoa mo solitulafono ma le lē faamaoni e fesootai ma taaloga po o taaloga eseese tau tupe; ma

- (g) ia mautinoa ai le faaaogāina tatau o tupe mai taaloga ma taaloga eseese tau tupe mo faamoemoega o le atunuu.

3. Faamatalaina o uiga o upu:

- (1) I totonu o lenei Tulafono ae vagana ai e ese le faamoemoega o aliali mai:

“pepa faatumu faamaonia” o lona uiga o se pepa faatumu ua faamaonia e le Ofisa Sili o Pulega mo le faaaogāina i lalo o lenei Tulafono;

“tulaga faataatitia faamaonia” o lona uiga o tulaga faataatitia, tulafono laiti o aga masani ma taualumaga e faagaoioi ai ua faamaonia e le Pulega i lalo o le Tulafono o le Faafoega o Kasino ma Taaloga Eseese Tau Tupe 2010, mo so o se faamoemoega i lalo o lenei Tulafono;

“faatagaina” o lona uiga ua faatagaina e le Pulega;

“faamatalaga o faamoemoega faatagaina” o lona uiga o se faamatalaga o se faamoemoe ua aiaia i totonu o le fuaiupu 10;

“sui faatagaina” o lona uiga o se tagata e toatasi ua faatagaina e se faalapotopotoga e galue e avea ma ona sui i se talosaga mo se faamatalaga o faamoemoega faatagaina, ma o ia lea e nafa ma le tausisia e le kalapu o le faafoega o ana gaoioiga tau taaloga eseese tau tupe;

“Pulega” o lona uiga o le Pulega o le Faafoega o Taaloga Eseese Tau Tupe ua faavaeina i lalo o le Tulafono o le Faafoega o Kasino ma Taaloga Eseese Tau Tupe 2010;

“bingo” o lona uiga o le taaloga ua masani ona iloa i lalo o lea igoa lea o lo o faatino ai taaloga eseese tau tupe e tusa ai ma tulafono o lea taaloga lea e aofia ai tulaga uma nei:

- (a) e filifili taumatemate fuainumera ma faasalalau atu i e o taaalo ai;
- (b) e faailoga e tagata taaalo pe ufiufi foi fuainumera o lauina, i luga o a latou pepa taalo;
- (c) o tagata e malo o le au taaalo o i latou ia ua mafai ona faailoga pe maka se faatulagaga o fuainumera ua tuuina mai i luga o pepa taalo ma faailoa lautele atu lea tulaga i

le au taaalo faatasi ai ma i latou o lo o faafoeina le taaloga
ma i latou o lo o faamaopoopoina,

ma e aofia ai so o se isi taaloga o lo o faafoeina i lea faiga.

“Ofisa Sili o Pulega” o lona uiga o le Ofisa Sili o Pulega o le Pulega,
ma e aofia ai so o se tagata e galue suitulaga i lea tofiga mai lea
taimi i lea taimi;

“kamupani” e aofia ai se faalapotopotoga;

“faafoe” e aofia ai le faalauiloaina, faamaopoopo, pulea po o le
faagaoioia;

“kalapu” o lona uiga o se faalapotopotoga ua tuufaatasia
faaletulafono po o le tuufaatasiga o ni tagata e faatuina ai se
kalapu, faalapotopotoga, sosaiete po o isi faalapotopotoga o
tagata, ma o lo o faamalieina ai manaoga o le faafuaiupu (2);

“Faamasinoga” o lona uiga o se faamasinoga e faatuatua ana
faaiuga i totonu o Samoa ua faavaeina i lalo o le Faavae po o se
Tulafono;

“taaloga eseese tau tupe” o lona uiga o le taaloga po o le petipeti mo
taui (i se faiga tuusao pe leai foi) i tupe e maua e sailia ai le malo
i ni tupe po o le aogā o tupe pe afai o faalagolago atoa po o se
vaega i le taunuuga e laki; ma e aofia ai mea uma ua taua e
faapea:

(a) o se polokalame faalauiloa o le faatauina atu ai oloa ma
auaunaga, lea e aofia ai le taaloga po o le faia o petipetiga
mo tau tau tupe i sea faiga;

(b) faia o se peti po o petipetiga ma se tagata po o se pisinisi
e aofia ai pisinisi fai petipetiga;

(c) petipetiga, tologiina o tupe, po o le petipeti mo tau tau
tupe i luga o taunuuga o ni taaloga,

peitai e lē aofia ai se gaoioiga, amioga po o feuaiga tau tupe ua
faailoa manino i tulafono faatonutonu ua faia i lalo o lenei
Tulafono, e le o ni taaloga eseese tau tupe.

“taaloga” o lona uiga o le taaloga mo le maua mai o tupe po o isi mea
aogā i so o se taaloga o matematega, po o so o se taaloga e fefiloi
ai le laki ma le tomai, e aofia ai taaloga e faatino i le taimi lava

lea, tausinioga i faailoga ma tausinioga e aofia ai le faaaogāina o masini feaveai tau fesootaiga i so o se faiga;

“taaloga eseese tau tupe faasolitulafono” o lona uiga o so o se ituaiga o taaloga eseese tau tupe e lē faatagaina i lalo o lenei Tulafono po o le Tulafono o le Faafoega o Kasino ma Taaloga Eseese Tau Tupe 2010;

“tagata asiasi” o lona uiga o se tagata ofisa o le Pulega ua tuuina i ai le malosiaga faapea i lalo o le Tulafono o le Faafoega o Kasino ma Taaloga Eseese Tau Tupe 2010;

“taaloga tau tupe e faatino i lea lava taimi” o lona uiga o se ituaiga o taaloga tau tupe lea ua faatulagaina se pepa e malo ai po o le tupe po o isi tau, a o lumanai ai po o le taimi lava lea i le faatauina atu o pepa, e le i fuafuaina po o le laki atoa ai;

“laisene” o lona uiga o se laisene na tuuina atu i lalo o lenei Tulafono e faafoe ai so o se taaloga eseese tau tupe ua faatagaina i lalo o lenei Tulafono;

“tagata ua laiseneina” o lona uiga o se tagata e toatasi, kalapu po o se kamupani ua laiseneina i lalo o lenei Tulafono, e faafoe so o se ituaiga o taaloga ma taaloga eseese tau tupe ua faatagaina;

“lūlū” o lona uiga o se polokalame po o se masini e aafia ai tagata o taaalo ai ia e faaaogā i ai mea uma nei e lua ua taua e faapea:

- (a) o se tagata e tofogi se tupe ina ia taalo ai, i se faiga tuusao pe leai foi; ma
 - (b) e tufatufa faailoga tupe e tusa ai ma se se’i e faia pe a maea ona tofogi tupe a tagata taalo uma,
- ma e aofia ai le taaloga o le loto, lūlū ma petipetiga i tuuga solofanua.

“tupe” e aofia ai malo e le o ni tupe (tusa lava pe mafai ona faaliliu i tupe pe leai foi) ma le aia tatau i tupe;

“taaloga eseese tau tupe e lē faalauteleina” o lona uiga o taaloga tau tupe a tagata e faia i se fale tumaoti o nofoia e faaaogā ai tulaga uma nei:

- (a) e tufatufa tupe uma na peti e aveia ma tau i tagata e faamanuiaina;

- (b) o le taaloga tau tupe lava ia, o se taaloga e faasino tonu i taaloga faafiafia po o se faafiafiaga;
- (c) e lē totogiina pe maua e se tagata se totogi, komisi, po o ni tau, mo le faafoega o le taaloga tau tupe;
- (d) e lē faatosinaina foi tagata o lo o nofoia le fale (i se tulaga aloaia pe leai foi) ina ia auai i lea taaloga tau tupe e ala i se faasalalauga faatosina, faasilasilaga, po o isi auala;
- (e) afai o le taaloga eseese tau tupe e aofia ai le taalo po o le peti faasaga i se tagata o lana matafai oi o le “teuina o tupe”, o lea matafai oi e mafai ona faasee mai le tasi tagata i le isi e ala i le laki po o le faataamilosaga masani i tagata uma, e aunoa ma le totogiina o se tupe po o isi tuutuuga;
- (f) o tagata taaalo uma e maua avanoa tutusa e faamanuiaina ai;
- (g) e leai se tagata e ese ai na i lo tagata taaalo e i ai le avanoa e faamanuiaina ai;
- (h) e lē totogiina e se tasi se tupe e ulufale ai i se faiga tuusao pe leai foi;
- (i) e lē toesea se tupe o so o se ituaiga mai peti po o faamanuiaga e maua e tagata taaalo.

“tauvaga mo faailoga” o lona uiga o se polokalame po o se tauvaga e faaaogā i ai tulaga uma nei:

- (a) tupe e totogi tuusao pe leai foi e taalo ai;
- (b) e tufatufa faailoga tupe po o isi e tutusa le aofai ma tupe, po o le taumafai o le au taaalo e saili auala e faamanuiaina ai i tupe, po o isi faailoga o so o se ituaiga ma le tau aogā i tupe;
- (c) o le taunuuga e fuafua sona vaega i le laki, po o sona vaega foi, e ala i le faatinoga e le tagata taalo o se gaoioiga o se ituaiga e mafai ona faatino lelei e se isi tagata taalo o lo o ia umia po o faatinoina e ala i lona tomai po o le agavaa, tusa lava pe mafai pe leai foi ona faatino lelei e ala i le laki.

“taaloga eseese tau tupe faatuatuaia” o lona uiga o le auai faaletulafono i taaloga eseese tau tupe ia o lo o faamalieina ai taiala faavae uma nei:

- (a) e tusa ai ma le tulafono, lē faaituau ma faamaoni;
- (b) e faafoe i se siosiomaga saogalemu ma malupuipua;
- (c) e faafoe e aunoa ma le faamalasia po o le faaaogāina o masini ua fuafuaina e faamalasia ai taaloga eseese tau tupe i le maualuga e ono mafai ona tulai mai ai lamatiaga;
- (d) e faia e tagata taalo ua iloa lelei ma malamalama i le uiga moni o le taaloga ma e lē taaalo i ni auala e ono tulai mai ai ni tulaga lamatia.

“pepa faataga” o lona uiga o se pepa aloaia po o se mea e avea ma molimau o le taalo ai i taaloga eseese tau tupe, po o o lo o faailoa ai lea auai i le taaloga, ma afai e le o i ai i sea pepa aloaia po o se mea e talafeagai i so o se taaloga eseese tau tupe faapitoa, e aofia ai le aia tatau e taalo ai i taaloga eseese tau tupe.

- (2) Mo faamoemoega o lenei Tulafono, e ao ona tuufaatasia faaletulafono se kalapu i lalo o le tulafono ma faatuina mo se faamoemoega e ese ai na i lo le faamanuiaina ai na o le toatasi, ma e ao ona faaaogā uma i ai tulaga nei:

- (a) o teugatupe i le faletupe e manaomia saina e sili atu na i le tasi;
- (b) e ao ona sueina faa suetusi teugatupe faletausaga ma avanoa mo suesuega;
- (c) e ao ona avanoa faalauaitete le avea ai ma sui i tagata e i ai aia;
- (d) e lē agavaa sui ma tagata o umia tulaga tofi o le kalapu i tufatufaga o tupe maua po o tupe faasili a le kalapu.

VAEGA 2
PULEGA E FAATONUTONUINA FAALETULAFONO
TAALOGA ESEESE TAU TUPE

4. Galuega tauave ma malosiaga o le Pulega:

- (1) E faaopoopo atu i ana galuega tauave i lalo o le Tulafono o le Faafoega o Kasino ma Taaloga Eseese Tau Tupe 2010, ua i ai i le Pulega galuega tauave nei i lalo o lenei Tulafono:
 - (a) e faatonutonu faaletulafono ma mataitu taaloga ma taaloga eseese tau tupe i totonu o Samoa;
 - (b) e faatonutonu faaletulafono ma mataitu gaoioiga i masini tau petipetiga i totonu o Samoa;
 - (c) e faatonutonu faaletulafono ma mataitu taaloga loto po o lūlū i totonu o Samoa;
 - (d) e faalauiloa ma faafaigofie taaloga eseese tau tupe faatuatuaina;
 - (e) so o se isi lava galuega tauave faatonuina.
- (2) E i ai malosiaga i le Pulega e faia ai so o se mea e talafeagai mo, po o e ono aliae mai i ana galuega tauave i lalo o le faafuaiupu (1).
- (3) E aunoa ma le faatapulaaina o le faafuaiupu (1), e i ai i le Pulega malosiaga uma nei:
 - (a) e sainia maliega mo le faamoemoe o lenei Tulafono;
 - (b) e tuuina atu laisene i lalo o lenei Tulafono;
 - (c) e faia ai, faaaogā ma faamalosia tulafono faafoe mo taaloga;
 - (d) e taulimaina ma faasoasoa tupe mai taaloga ma taaloga eseese tau tupe;
 - (e) e auai ai po o le faafoe o taaloga po o gaoioiga o taaloga eseese tau tupe e pei ona faatagaina i lenei Tulafono;
 - (f) e faatagaina po o le manaomia le faia o tagi faasaga i tagata ua laiseneina e tusa ai ma lenei Tulafono;
 - (g) ia mautinoa le faia o gaoioiga e toe faaola mai ai totogifuapauina o laisene mo laisene na tuuina atu i lalo o lenei Tulafono, ma faatino isi malosiaga e fesootai i

totogifuapauina e aofia ai le malosiaga e tuusaunoa ai tului i totogifuapauina o laisene e le i totogiina;

- (h) ia faamautinoa i se isi faiga e ese ai le faamamaluina o lenei Tulafono e ala i le faia o ni tagi faasaga i tagata, o i latou ia ua solia lenei Tulafono po o tulafono faatonutonu ua faia ai i lalo.

5. Malosiaga o le Ofisa Sili o Pulega:

E i ai i le Ofisa Sili o Pulega malosiaga uma nei:

- (a) e tuuina atu ai laisene ua faamaonia e le Pulega e tusa ai ma lenei Tulafono;
- (b) e faaaogā ai ma faamalasia tulafono faafoe mo taaloga ua faamaonia e le Pulega;
- (c) e faamaonia ai po o le leai foi meafaigaluega ma tagata e tuuina atu oloa ma auauunaga e faaaogāina e tagata e umia laisene;
- (d) e manaomia ai se tagata o faafoeina se taaloga po o ni taaloga eseese tau tupe ina ia tuuina atu faamatalaga mo suesuega, auiliiliga o faiga faavae ma faamoemoega tau atinae;
- (e) ia faia tagi faasaga i tagata ua laisene ina ia tusa ai ma lenei Tulafono;
- (f) ia toe faaolaina mai totogifuapauina o laisene mo laisene na tuuina atu i lalo o lenei Tulafono, ma faatino isi malosiaga e tusa ai ma totogifuapauina e aofia ai le malosiaga e tuusaunoa ai tului o totogifuapauina o laisene e le i totogiina;
- (g) ia faamalasia i se isi faiga e ese ai lenei Tulafono e ala i le faia o tagi faasaga i tagata o i latou ia ua solia lenei Tulafono, po o tulafono faatonutonu ua faia ai i lalo.

6. Tuuina atu o le pule faataga i lalo o lenei Tulafono:

- (1) E i ai i le Ofisa Sili o Pulega le pule e tuuina atu ai i se tagata ofisa o le Pulega so o se tasi po o malosiaga uma lava i lalo o lenei Tulafono, vagana ai lenei malosiaga o le tuuina atu o le pule faataga.
- (2) E mafai e le Pulega ona fuafua malosiaga ia e lē mafai ona tuuina atu e le Ofisa Sili o Pulega i lalo o lenei Tulafono.

- (3) O le tuuina atu o se malosiaga i lalo o lenei fuaiupu e ao ona faia i se faiga tusitusia.
- (4) O le tuuina atu o se malosiaga i lalo o lenei fuaiupu e lē mafai ona taofia mai ai le Ofisa Sili o Pulega mai le faatinoga o lea galuega tauave po o se malosiaga.
- (5) O le tuuina atu o se malosiaga e faia i lalo o lenei fuaiupu e mafai ona faalēaogāina i le loto i ai e ala i se faaiuga a le Ofisa Sili o Pulega.
- (6) O le tuuina atu o se malosiaga ua faia i lalo o lenei fuaiupu e faaaogā i so o se tagata o ia lea ua ia umia faaletulafono mulimuli ane le tofiga o se tagata ofisa lea ua tuuina atu i ai le malosiaga, ma faaaauau ai ona faamalosi seia vagana ua faalēaogāina lea malosiaga tuuina atu, e le Ofisa Sili o Pulega.

VAEGA 3

FAIGA E FAAFOE AI TAALOGA

ESEESE TAU TUPE

7. **Pepa faatumu faatagaina o taaloga ma taaloga eseese tau tupe:**

- (1) E na o le pau lava ituaiga taaloga eseese tau tupe e faataga i Samoa, o gaoioiga tau taaloga ma taaloga eseese tau tupe e ogatasi ma itu nei:
 - (a) o gaoioiga tau taaloga ma taaloga eseese tau tupe e mo se faamoemoega faatagaina i lalo o lenei Tulafono, ma o lo o tausisia manaoga uma talafeagai i lalo o lenei Tulafono, ma so o se tuutuuga talafeagai o le laisene, tulafono faafoe o le taaloga ma tulaga faataatitia faamaonia;
 - (b) o gaoioiga tau taaloga ma taaloga eseese tau tupe lea e aofia i le vasega o taaloga eseese tau tupe e le faailoaina faalauaitete;
 - (c) o taaloga eseese tau tupe e faia i kasino e pei ona faatagaina i lalo o le Tulafono o le Faafoega o Kasino ma Taaloga Eseese Tau Tupe 2010;

- (d) taaloga e faaaogā ai masini faa-komepiuta (e aofia ai taaloga tau petipetiga e faia i luga o initaneti) ia ua tuuina atu ai laisene i lalo o le Tulafono o le Faafoega o Kasino ma Taaloga Eseese Tau Tupe 2010.
- (2) E faasaina ma solitulafono isi ituaiga taaloga eseese tau tupe uma.
- (3) E aunoa ma le faatapulaaina o le tulaga lautele o le faafuaiupu (2), e faasaina ma solitulafono isi ituaiga taaloga eseese tau tupe nei, ma e lē mafai ona faatagaina i lalo o lenei Tulafono:
 - (a) petipetiga;
 - (b) so o se isi lava gaoioiga tau taaloga eseese tau tupe lea e faasaina i Tulafono Faatonutonu ua faia i lalo o lenei Tulafono.
- (4) Mo faamoemoega o le faafuaiupu (3) “petipetiga”:
 - (a) o lona uiga o se pisinisi lea e aafia ai so o se tasi o gaoioiga nei -
 - (i) aveina po o feutagaiga tau petipetiga;
 - (ii) faamaopoopoina o petipetiga i vaega;
 - (iii) faatulagaga o tagata taaalo i taaloga eseese tau tupe;
 - (iv) faia o peti po o le ofoina o peti faasala ese;
 - (v) ofoina atu e peti ma ni tagata e sili atu i le 1; ma
 - (b) e lē aofia ai se tasi o itu nei -
 - (i) gaoioiga a se kalapu fai tuuga;
 - (ii) taaloga eseese tau tupe e lē faalauteleina;
 - (iii) petipetiga e faia i masini e fai ai peti taitasi ua faatagaina i lalo o lenei Tulafono;
 - (iv) petipetiga i taaloga e faia i luga o initaneti lea e faataga ma laiseneina e avea ma taaloga eseese tau tupe e faaaogā ai masini faakomepiuta i lalo o le Tulafono o le Faafoega o Kasino ma Taaloga Eseese Tau Tupe 2010.
- (5) So o se tagata na te faafoeina se gaoioiga o taaloga eseese tau tupe lea e faasaina i lalo o lenei fuaiupu, ua ia faia se soligatulafono ma e noatia i luga o moliaga ua faamaonia faaletulafono, i se sala tupe e

lē silia le 100 iunite tau faasalaga, po o e nofosala i le falepuipui mo se vaitaimi e lē silia le tolu (3) tausaga, po o faasalaga uma e lua.

8. E faasaina ona taaalo tamaiti i taaloga eseese tau tupe:

- (1) E faasaina se tamaitiiti e i lalo ifo o le 21 tausaga le matua ona taalo i taaloga eseese tau tupe.
- (2) Ua faia e se tagata o ia lea e i lalo ifo o le 21 tausaga le matua, se soligatulafono pe afai ua ia solia lenei fuaiupu, ma e noatia i luga o moliaga ua faamaonia faaletulafono i se sala tupe e lē silia le 5 iunite tau faasalaga.
- (3) So o se tagata o ia lea:
 - (a) ua ia faafoeina ni gaoioiga o taaloga eseese tau tupe ma ia solia le faafuaiupu (1); po o
 - (b) ua mafua ia te ia ona faatulai mai po o ua ia faatagaina le solia o le faafuaiupu (1),
 ua ia faia se soligatulafono ma e noatia i luga o moliaga ua faamaonia faaletulafono i se sala tupe e lē silia le 50 iunite tau faasalaga, po o le nofosala i le falepuipui mo se vaitaimi e lē silia le tausaga e tasi (1), po o faasalaga uma e lua.

9. Faailoga faasaina:

- (1) E lē mafai ona faaaogāina i taaloga eseese tau tupe so o se faailoga po o so o se tau nei:
 - (a) oloa tau tapaa;
 - (b) ava malosi;
 - (c) fana;
 - (d) auaunaga tau faiga aiga mataga;
 - (e) fanua faaleaganuu;
 - (f) so o se isi lava pule i eleele (vagana ai o ia eleele ua ofoina atu e ala i se lūlū ua laiseneina faaletulafono);
 - (g) tupe totogi e faaaogā ai masini feaveai tau fesootaiga o so o se ituaiga;
 - (h) meataitasi tau talafaasolopito e pei ona faatonuina e Tulafono Faatonutonu ua faia i lalo o lenei Tulafono.

- (2) O Tulafono Faatonutonu ua faia i lalo o lenei Tulafono e mafai ona faatonuina ai faailoga faaopoopo faasaina, ma faamaoti ai meatotino po o ituaiga meatotino ia e lē tatau ona ofoina atu e avea ma tau mo taaloga po o taaloga eseese tau tupe.
- (3) O se tagata o ia lea na te ofoina atu pe faaogā meatotino, po o se vasega o meatotino e avea ma faailoga po o se tau e lē usitaia ai lenei fuaiupu, ua ia faia se soligatulafono ma e noatia i luga o moliaga ua faamaonia faaetutulafono i se sala tupe e lē silia le 50 iunite tau faasalaga, po o le nofosala i le falepuipui i se vaitaimi e lē silia le tolu (3) tausaga, po o faasalaga uma e lua.

10. Faamatalaga o faamoemoega faatagaina:

- (1) Mo faamoemoega o lenei fuaiupu ma so o se isi lava aiaiga o lenei Tulafono, “o se faamoemoega faatagaina” o lona uiga o taaloga po o taaloga eseese tau tupe mo so o se faamoemoega ua taua e faapea:
 - (a) o se faamoemoe mo galuega fesoasoani;
 - (b) e lagolago ai se ekalesia po o se faalapotopotoga faale-lotu;
 - (c) o se faamoemoega e le faapisinisi lea e faamanuiaina ai atoa po o se vaega o le atunuu;
 - (d) o se kalapu, po o se faalapotopotoga (i mea tau taaloga po o isi) ia e sailia ai tupe mo le manuia o ona sui po o, le totogiina ai o tupe o ni aitalafu a le kalapu po o le faalapotopotoga;
 - (e) so o se isi lava faamoemoega lea ua faatatauina e avea ma faamoemoega faatagaina i Tulafono Faatonutonu ua faia i lalo o lenei Tulafono.
- (2) E leai se laisene e mafai ona tuuina atu e faataga ai ni taaloga po o taaloga eseese tau tupe e tusa ai ma lenei Tulafono vagana ai ua tuuina atu se faamatalaga o faamoemoega faatagaina i le Ofisa Sili o Pulega ma faapea ona faamaonia i lalo o lenei fuaiupu mo taaloga ma taaloga eseese tau tupe ua fuafuaina.
- (3) E mafai ona faia se talosaga i le Ofisa Sili o Pulega mo le faamaoniga o se faamatalaga o faamoemoega faatagaina pe afai o sea faamatalaga o se manaoga o i lalo o se aiaiga o lenei Tulafono.

- (4) O se talosaga ua faia i lalo o le faafuaiupu (2) e ao ona faia i le pepa faatumu faamaonia ma tuuina atu faatasi ma le totogifuapauina faamaonia, ma e ao ona auina atu faatasi ma le faamatalaga o tuuina atu ai auiliiliga atoatoa o gaoioiga ua talosagaina, ina ia faamalieina ai le Ofisa Sili o Pulega e faapea, o gaoioiga tau taaloga ma taaloga eseese tau tupe e mo se faamoemoega faamaonia e pei ona aiaia i lalo o lenei fuaiupu.
- (5) E ao i se talosaga ua faia i lalo o le faafuaiupu (4) ona filifilia ai se sui filifilia faatagaina ua i ai le pule faataga e galue ai e aveva ma sui o lē ua talosaga, ma o le a fitoitonu ma ia le tausisia e le tagata talosaga o manaoga faaletulafono uma e faasino i le faafoega o gaoioiga o taaloga ma taaloga eseese tau tupe ua laiseneina.
- (6) E i ai le pule faataga a le Ofisa Sili o Pulega e faamaonia ai se faamatalaga o faamoemoega faatagaina, ma i le faia ai o se faaiuga pe talia pe leai foi sea faamatalaga, e ao i le Ofisa Sili o Pulega ona iloilo manaoga faatonuina uma ma so o se faiga faavae faamaonia ua faia e le Pulega e tusa ai ma ia faamatalaga.
- (7) O le faamaoniga mo se faamatalaga o faamoemoega faatagaina e mafai ona faalēaogāina i so o se taimi e le Ofisa Sili o Pulega po o, e ala i se faaiuga a le Pulega.
- (8) Afai ua faia se faaiuga a le Ofisa Sili o Pulega e faapea o le a lē faamatuuina atu se faamaoniga o se talosaga i lalo o lenei fuaiupu, e i ai i lē ua talosaga le aia tatau e faia ai se talosaga tusitusia, i totonu o le fitu (7) aso ina ua ia taulimaina le faasilasilaga o le teena ai, i le Pulega e toe iloilo lea faaiuga, ma i so o sea mataupu, e mafai e le Pulega ona faamaonia le faaiuga a le Ofisa Sili o Pulega, po o le faatonuina ina ia faamaonia se faamatalaga o faamoemoega ua faatagaina, i luga o ia tuutuuga ma aiaiga e pei ona fuafuaina e le Pulega.
- (9) E i ai i le Ofisa Sili o Pulega le pule faataga e mataitu ai gaoioiga a le tagata ua laiseneina, e fuafua ai o lo o ia tausisia le faamatalaga o faamoemoega faatagaina, ma e mafai ona ia faatino so o se tasi o malosiaga nei:

- (a) e mafai ona manaomia le tagata ua laiseneina ina ia tuuina atu so o se faamatalaga talafeagai e fuafuaina ai po o tausisia le faamatalaga ma mataupu ua faailoa mai i le talosaga mo lea faamatalaga;
 - (b) e mafai ona manaomia le tagata ua laiseneina ina ia tuuina atu faamaumauga ma faamatalaga tau tupe e fuafuaina ai le tausisia;
 - (c) e mafai e le Ofisa Sili o Pulega ona tuuina atu se faatonuga i le tagata ua laiseneina e faapea, ia faafoe nei gaoioiga i so o se faiga faapitoa ina ia tausisia ai lenei fuaiupu.
- (10) O sē ua talosaga po o le tagata ua laiseneina o ia lea ua ia solia so o se manaoga e faaaogā i lalo o lenei fuaiupu, ua ia faia se soligatulafono ma e noatia i luga o moliaga ua faamonia faaletulafono i se sala tupe e lē silia le 100 iunite tau faasalaga.
- (11) E mafai ona faalēaogāina se laisene na tuuina atu i lalo o lenei Tulafono po o le taofia lē tumau pe a ono tulai mai o so o se soliga o se manaoga i lalo o lenei fuaiupu.
- (12) O Tulafono Faatonutonu ua faia i lalo o lenei Tulafono e mafai ona faatonutonu ai so o se mataupu e faasino i faamatalaga o faamoemoega faatagaina.

VAEGA 4

PETIPETIGA E FAAAOGĀ AI MASINI E FAAMAUMAU AI PETI TAITASI

11. Faafoega o se masini e faamaumau ai peti taitasi:

- (1) I totonu o lenei Vaega vagana ai e foliga mai e ese le faamoemoe o aliali mai:
- “tuuga” o lona uiga o se tuuga solofanua, tuuga taifau, tuuga solofanua laiti po o tuuga solofanua laiti e tosaina taavale māmā tai 2 uili ma e aofia ai le tulaga e faasino i se peti, e tasi le peti, i taunuuga o le 2 po o le sili atu o tuuga, o tuuga uma e faasino i peti ua maea ona fai;

“kalapu fai tuuga” o lona uiga o se kalapu ua faatuina po o faauau pea ona i ai mo le faamoemoe o le faafoega po o le faatonutonuina o tuuga;

“malae tutuu” o lona uiga o fanua, tusa lava po o totonu po o fafo atu o Samoa, lea e faaaogā mo tuuga ma ia e maua mai e ala i faatagaga e totogi ai tupe, e ala i pepa po o isi faiga e ese ai;

“petipetiga e faaaogā ai masini e faamaumau ai peti taitasi” o lona uiga o petipetiga:

- (a) i se malae tutuu po o so o se nofoaga e ese ai na i lo se malae tutuu, e ala i le faia o peti i se tuuga i luga o masini e faamaumau ai peti taitasi;
- (b) so o se isi lava tuuga ua faatonuina, tauvaga taaloga, po o se mea o tulai mai.

(2) E lē tatau i se tagata ona faaaogā se masini e faamaumau ai peti taitasi vagana ai o lea tagata ua i ai i lea taimi se faamatalaga o faamoemoega faatagaina na tuuina atu i lalo o le fuaiupu 10 e talafeagai i sea petipetiga, ma se laisene ua tuuina atu, e le Pulega mo ia gaoioiga.

(3) E mafai ona faia e le Pulega se maliega i lalo o lenei fuaiupu ma se faalapotopotoga i se isi atunuu lea ua faatagaina e le tulafono a lea atunuu, e faafoe ai po o le faia o petipetiga i masini e faamaumau ai peti taitasi.

(4) O se maliega ua faia i lalo o le faafuaiupu (3) e mafai ona aiaia ai e faapea:

- (a) o le a faia e le faalapotopotoga i le isi atunuu peti e faaliliuina atu i ai e le Pulega i luga o se masini e faamaumau ai peti taitasi e faafoe i lea atunuu, ma toe faafoi mai i le Pulega ia tufatufaga e tusa ai ma peti ua faapea ona faaliliuina atu i ai, e pei ona faailoa manino i le masini e faamaumau ai peti taitasi lea na faia ai petipetiga;
- (b) o le a faafoi mai e le faalapotopotoga i le Pulega sea aofaiga e avea o se komisi e totogiina mai le aofaiga o peti na taulimaina e lea faalapotopotoga mai le Pulega e pei ona malilie faatasi i ai i le va o le faalapotopotoga ma le Pulega;

- (c) o le a faia e le Pulega peti ua faaliliuina atu i ai e lea faalapotopotoga i luga o le masini e faamaumau ai peti taitasi o faafoe e le Pulega, ma faafoi atu i lea faalapotopotoga tufatufaga e totogi e tusa ai ma peti ua faia e le Pulega e tusa ai ma lenei Tulafono; ma
- (d) o le Pulega -
- (i) o le a ia faafoi atu i lea faalapotopotoga sea aofaiga e avea o se komisi e totogi mai le aofaiga o peti na taulimaina e le Pulega mai lea faalapotopotoga e pei ona malilie faatasi i ai, i le va o lea faalapotopotoga ma le Pulega; po o
- (ii) afai, e tusa ai ma peti ua faaliliu atu i le Pulega e le faalapotopotoga, o peti ua aofia ai i se vasega ua faamaotiina po o vasega o peti, o le a taofia e le faalapotopotoga, mai le aofaiga o peti taitasi ua faapea ona faaliliu atu i le Pulega, e avea ma komisi, sea aofaiga e pei ona malilie i ai i le va o lea faalapotopotoga ma le Pulega, ma o le a totogi atu i le Pulega sea aofaiga, e pei ona e avea ma komisi e tusa ai ma le faia o ia peti e le Pulega, e pei ona malilie i ai i le va o lea faalapotopotoga ma le Pulega.
- (5) O le toe faafoi atu o se aofaiga e avea ma komisi ua taua i le faafuaiupu (4)(b) po o le (d)(i), e mafai ona faia i le noatia ma le fai fuafua i ia tuutuuga e faasino i le talosagaina o le komisi e pei ona malilie faatasi i ai vaega auai uma i le maliega.
- (6) Afai ua faaliliu atu peti i le Pulega e tusa ai ma se maliega ua faia i lalo o lenei fuaiupu, ma o lo o taofia e le faalapotopotoga na ia faaliliuina atu ia peti i le Pulega, e tusa ai ma se aiaiga i lea maliega le ituaiga o lo o faasinomia i le faafuaiupu (4)(d)(ii), mai le aofaiga o ia peti, le komisi i lalo o lea aiaiga, e lē tatau la i le Pulega ona taofia mai le aofaiga o ia peti na faaliliuina atu so o se komisi i lalo o lenei Vaega.

- (7) E ao i se kalapu fai tuuga o lo o faafoeina tuuga i se malae tutuu i Samoa ona faaavanoa ia fale i le Pulega i le malae tutuu e pei ona talafeagai ai, pe afai e le i fausia e le Pulega se ofisa po o se lala sooupu i le malae tutuu, e mafai ai e le Pulega ona faafoe fale mo masini e faamaumau ai peti taitasi i le malae tutuu.
- (8) O se faasinomaga ua faia i lenei Tulafono i se ofisa po o se lala sooupu o le Pulega e tatau, vagana ai e foliga mai e ese le faamoemoe o tulai mai, ona faatatauina e aofia ai fale ua faaavanoa atu i le Pulega i lalo o le faafuaiupu (7).
- (9) E i ai i le Pulega o i ai se masini e faamaumau ai peti taitasi ua laiseneina le pule faataga, mai le aofaiga o peti taitasi ua ia taulimaina ma faamaumauina ai i le masini o lo o ia faagaioia, ona taofia e avea ma komisi sea aofaiga e pei ona fuafuaina e le Pulega ina ia faapea ona taofia mo le vaega o peti.

12. **Petipetiga i masini i isi nofoaga e ese ai na i lo malae tutuu:**

- (1) O se peti e faia i se tuuga lea e mafai ona faia e tusa ai ma le tulafono i totonu o Samoa i se malae tutuu a o faagasolo se faatulagaga o tuuga, e mafai ona faia e ala i so o se faiga e faapea:
 - (a) o le Pulega, i se ofisa faatagaina po o le lala sooupu a le Pulega;
 - (b) i se ofisa o le tagata ua laiseneina e i ai le masini e faamaumau ai peti taitasi,
 tusa lava po o faafoe se faatulagaga o tuuga i se malae tutuu i Samoa i le aso ua fai ai peti, pe leai foi.
- (2) I le noatia ma le fai fuafua i lenei Tulafono, o le faagaioia o ofisa ma lala sooupu o le Pulega ma tagata ua laiseneina e i ai masini e faamaumau ai peti taitasi, e aofia ai itula faigaluega a ona ofisa ma lala sooupu, o le a faapea ona faia e pei ona fuafuaina e le Pulega.
- (3) E i ai i se tagata o ia lea o lo o ia pulea pe faafoeina se ofisa po o se lala sooupu o le Pulega, po o se masini ua laiseneina e faamaumau ai peti taitasi, le pule faataga e faia ai tulaga nei:
 - (a) e talosagaina se tagata o ia lea ua faasuaavā, faavevesi, faafinauvale, faia amioga lē faaaloalo, po o le faaotaota po o

- le fealualuai solo ai i le ofisa po o le lala sooupu, ina ia tuua e ia le ofisa po o le lala sooupu;
- (b) ia teena le faatagaina o sea tagata i le ofisa po o le lala sooupu.
- (4) E lē tatau i se tagata:
- (a) ona ulufale atu i se ofisa po o se lala sooupu o le Pulega ina ua teena le faatagaina i ai i lalo o le faafuaiupu (3); po o
- (b) le teena pe ua ia lē tuua se ofisa po o se lala sooupu o le Pulega ina ua maea ona talosagaina o ia e tuua lea nofoaga i lalo o le faafuaiupu (3).
- (5) Ua faia e se tagata se soligatulafono, o ia lea ua ia lē usitaia se aiaiga o le faafuaiupu (4), ma e noatia i luga o moliaga ua faamaonia faaletulafono i se sala tupe e lē silia le 10 iunite tau faasalaga.

13. Taliaina o petipetiga e faaaogā ai masini e faamaumau ai peti taitasi:

- (1) E faatoa tatau lava i le Pulega ona taliaina peti na faia i le masini e faamaumau ai peti taitasi i se ofisa faatagaina po o se lala sooupu o le Pulega.
- (2) E lē tatau i le Pulega ma so o se isi lava tagata ua laiseneina e faagaioioia se masini e faamaumau ai peti taitasi ona taliaina se peti mai se tagata vagana ai ua faaaogā itu nei:
- (a) o le aofaiga o le peti na totogi i tinoitupe i se ofisa faatagaina po o se lala sooupu i le taimi na faia ai;
- (b) o le aofaiga o le peti na taulimaina i se ofisa faatagaina po o se lala sooupu faatasi ai ma se tusi mai lea tagata o lo o faatulaga mai ai le peti;
- (c) o le peti na faia e ala i le faaliliuina atu i faiga faatelekarafi mai lea tagata na maua i se ofisa faatagaina po o se lala sooupu, ma o le totogiina o le aofaiga o lea peti na faatulaga atu e ala i ia auala;
- (d) na faia le peti e ala i so o se auala ua taua e faapea -
- (i) e ala i se tusi, feau feaveai i telefoni i, po o so o se isi lava auala faatonuina;

- (ii) e le tagata lava ia, i se ofisa faatagaina po o se lala sooupu e lea tagata, ma o le aofai na tofogi o le peti na faatagaina le faia mai se teugatupe e faa-aitalafu lea na faia e lea tagata i lalo o le fuaiupu 21 a o lumanai ai faamamaluina o le faatulagaga o tuuga, lea o lo o faagasolo ai le tuuga o faia ai petipetiga, ma o lo o faailoa ai le lava atoatoa o tupe faa-aitalafu i le taimi na faia ai le peti e tofogi ai le aofaiga o lea peti.
- (3) E lē tatau i le Pulega, ona talia se peti vagana ai i se aofaiga po o le sili atu ua faamaonia e le Pulega.
- (4) E lē tatau i se tagata, e tusa ai ma petipetiga e faaaogā ai masini e faamaumau ai peti taitasi, ona tuuina atu se pepa faataga po o isi faiga e taliaina ai ua faamoemoe e faasino i se peti ua faia i masini e faamaumau ai peti taitasi lea ua tuuina atu e le Pulega, po o isi tagata ua laiseneina e faagaoioia masini o petipetiga, vagana ai o ia o se tagata o lo o faafaigaluegaina e le Pulega po o se tagata ua laiseneina e faagaoioia masini e faamaumau ai peti taitasi mo lea faamoemoe.
- (5) Ua faia e se tagata se soligatulafono o ia lea ua ia lē usitaia le faafuiauupu (4), ma e noatia i luga o moliaga ua faamaonia faaletulafono i se sala tupe e lē silia le 20 iunite tau faasalaga.

14. Faia o peti:

E mafai e le Pulega po o se tagata ua laiseneina e faagaoioia masini e faamaumau ai peti taitasi ona faia se peti ua taliaina i lalo o lenei Tulafono i tulaga nei:

- (a) mo se tuuga o lo o faagaoioia e le Pulega po o se tagata ua laiseneina e faagaoioia masini e faamaumau ai peti taitasi, i lana lava masini e faamaumau ai peti taitasi i luga o lea masini;
- (b) mo se tuuga e le o faagaoioia e le Pulega po o se tagata ua laiseneina e faagaoioia masini a latou masini e faamaumau ai peti taitasi, i luga o le masini e faamaumau ai peti taitasi i se isi atunuu, o le masini a se faalapotopotoga o lo o faafoeina petipetiga i masini e faamaumau ai peti taitasi i lea atunuu i lea tuuga, e tusa ai ma se maliega ma lea

faalapopotoga i lalo o le fuaiupu 11(3), o le lala soupu a le Pulega.

15. Talosaga mo laisene e faafoe ai masini e faamaumau ai peti taitasi:

- (1) E mafai e se tagata ona talosaga i le Pulega mo se laisene e faagaoioi ai se masini e faamaumau ai peti taitasi mo faamoemoega o petipetiga e faaaogā ai masini i lalo o lenei Vaega.
- (2) E mafai e le Pulega ona faamaonia se talosaga i lalo o lenei fuaiupu ma tuuina atu se laisene faatasi ai ma tuutuuga e pei ona fuafuaina e le Pulega.
- (3) E tusa ai ma se laisene ua tuuina atu i lalo o lenei fuaiupu, e mafai e le Pulega ona faaaogā tuutuuga i le laisene e fuafua e ia e ao ona ogatasi ma lenei Vaega.

16. Tuutuuga e faasino i petipetiga e ala atu i le Pulega:

- (1) I le noatia ma le fai fuafua i lenei Tulafono, e mafai e le Pulega ona fuafua itu uma nei:
 - (a) o faatulagaga mo le tufatufaina o aofaiga o tupe e avea ma tufatufaga o peti na faia e ala i so o se auala faapitoa;
 - (b) o taimi e tapunia ai ma isi tuutuuga mo le taliaina o peti i ona ofisa ma lala soupu;
 - (c) o le auala e faailoagofie ai tagata o ofo mai e fai peti;
 - (d) o le auala e faailoa ai le talia o peti ua faia;
 - (e) o le faiga e faamaumau ai peti ua faia.
- (2) Ua faia e se tagata se soligatulafono, o ia lea o lo o galue i le Pulega ua ia talia se peti, po o ua ia faatagaina le talia o se peti, i so o se taimi e ese ai na i lo le taimi na fuafuaina e le Pulega e talia ai lea peti, ma e noatia i luga o moliaga ua faamaonia faaletulafono i se sala tupe e lē silia le 5 iunite tau faasalaga.

17. E lē faatagaina ona faia ni peti a tagata e le i atoa tausaga o le matutua:

- (1) O se tagata o ia lea ua ia faatagaina le faia o se peti a se tamaitiiti e i lalo ifo o le 21 tausaga le matua, e ala i le Pulega po o se masini ua

laisene e faamaumau ai peti taitasi, ua ia faia se soligatulafono ma e noatia i luga o moliaga ua faamaonia faaletulafono i se sala tupe e lē silia le 25 iunite tau faasalaga.

- (2) E i ai le pule faataga a se tagata o ia lea o lo o ia pulea po o faafoeina le, po o lo o galue i se ofisa po o se lala sooupu o le Pulega, po o se masini ua laiseneina e faamaumau ai peti taitasi, e manaomia ai e faapea o lea tagata ua manino e i lalo ifo o le 21 tausaga lona matua, ia na tuuina atu faamaoniga o lona matua, a o le i talia se peti mai lea tagata.

18. Tufatufaga:

- (1) E ao i le Pulega ma se tagata ua laiseneina e faagaoioia se masini e faamaumau ai peti taitasi, i se taimi vave lava e mafai ai ona faatino i le maea ai o faaiuga o tuuga taitasi o lo o faafoeina i fale o i ai masini e faamaumau ai peti taitasi po o lo o tuuina atu ai peti, ona totogi tufatufaga e tusa ai ma lenei fuaiupu i peti taitasi ia e totogi atu ai se tufatufaga.
- (2) Mo faamoemoega o le faafuaiupu (1):
- (a) o se peti o le peti lava e tusa ai ma tufatufaga e totogiina -
- (i) i le tulaga pe afai ua faia peti i luga o le masini o lo o faagaoioi e le Pulega - pe afai ua talia le peti ma faaaogā e avea ma peti lea e totogi ai tufatufaga; ma
- (ii) i le tulaga pe afai e faia peti i se masini ua laiseneina e faamaumau ai peti taitasi, e ese ai na i lo le masini o lo o faagaoioi e le Pulega - pe afai ua faailoa manino le peti i le masini e faamaumau ai peti taitasi lea na faia ai le peti lea e totogi ai tufatufaga; ma
- (b) o se faasinomaga i se peti lea e totogi ai le tufatufaga e ao ona faatatauina e aofia ai se peti lea e totogi ai le tupe toe faafoi e faaaogā i le tuuga lea na faia ai le peti ma vasega o peti, lea e aofia ai le peti, po o e totogi e le masini na faamaumau ai le peti na faia, po o le a lava le tulaga e i ai.
- (3) O le aofaiga aupito maualalo e ao ona totogi e le Pulega po o se masini ua laiseneina e faamaumau ai peti taitasi e avea ma

tufatufaga e tusa ai ma se peti na faia i se tuuga, e ese ai na i lo se tuuga e lua po o le sili atu solofanua na mua, tu lua po o le tu tolu, e \$1.00.

- (4) E lē noatia le Pulega po o se masini ua laisene e faamuamau ai peti taitasi e totogi atu se aofaiga o tupe e aveia ma tufatufaga e tusa ai o se peti i se tuuga, e le i tapaina malo, i le muta ai o le aogā o le vaitaimi e tolu (3) masina, mai le aso muamua na tatala ai le nofoaga na faia ai le peti, mo galuega i le maea ai o le aso o le tuuga.

19. Aiaiga e faaaogā pe afai e le o malo ni peti:

Afai e le o aofia ai i peti o se tuuga se peti i le solofanua e malo o le tuuga, po o se tuufaatasiga o peti e malo i le tuuga, o le aofaiga na fuafua e avanoa mo le tufatufaina e aveia ma tufatufaga, o le a tataua ona aveia ma vaega o le aofaiga e avanoa mo le tufatufaina atu e aveia ma tufatufaga i luga o isi peti.

20. O soligatulafono e faasino i tupe e totogi ai peti ua malo ma tupe toe faafoi:

O se tagata o ia lea ua ia faatagaina pe tuuavanoa e totogi atu se tufatufaga po o se tupe toe faafoi e ese ai na i lo le faiga e tusa ai ma leni Tulafono, ua ia faia se soligatulafono ma e noatia i luga o moliaga ua faamaonia faaletulafono i se sala tupe e lē silia le 5 iunite tau faasalaga.

21. Teugatupe Faa-aitalafu:

- (1) E mafai e se tagata, e pei ona fuafuaina e le Pulega, ona faia se teugatupe faa-aitalafu i le Pulega e ala i le teuina o se aofaiga ia lē itiiti ifo na i lo le \$2 ma e mafai, e pei ona fuafuaina e le Pulega, ona ia teuina nisi tupe i totonu, po o le aofaiga faa-aitalafu e aveia ma tufatufaga e tusa ai ma peti na malo i le teugatupe.
- (2) Afai e lē faia ni peti e auala atu i le Pulega e se tagata mai lana teugatupe faa-aitalafu mo se vaitaimi e tolu (3) masina, e ao i le Pulega, e ala i se tusi e lafoina atu i lona tuatusi mulimuli na mau ai, ona logoina le tagata e uiga i le aofai o lo o ia aitalafu ai i lea teugatupe.

- (3) Afai, i totonu o le vaitaimi e tasi (1) le masina ina ua maea ona lafoina atu le faasilasilaga ua taua i le faafuaiupu (2), ae e le i toe faia ni peti e tusa ai ma le teugatupe faa-aitalafu a le tagata, e le noatia le Pulega e toe faafoi atu so o se aofaiga o tupe o lo o i ai i le teugatupe a lea tagata.
- (4) E lē mafai ona faatagaina i se masini ua laisene e faamaumau ai peti taitasi ni teugatupe faa-aitalafu e faagaoioia e se tagata o faaaogāina le auanaga seia vagana ai ua faamaonia e le Pulega le faaaogāina o lea teugatupe.
- (5) O se faamaoniga ua faia i lalo o le faafuaiupu (4) e noatia i tuutuuga ua faaee atu e le Pulega, ma o ia tuutuuga e mafai ona faaaogā i so o se taimi a o faaaogāina pea lea faamaoniga.
- (6) O se tagata ua laiseneina o ia lea ua ia solia le faafuaiupu (1), po so o se tuutuuga ua faaaogā i lalo o le faafuaiupu (5), ua ia faia se soligatulafono ma e noatia i luga o moliaga ua faamaonia faaletulafono i se sala tupe e lē silia le 50 iunite tau faasalaga.

22. Teugatupe o Tufatufaga Tutusa:

- (1) E ao i le Pulega ma so o se tagata ua laiseneina e faagaoioia masini e faamaumau ai peti taitasi, ona tausia se teugatupe ia taua o le Teugatupe o Tufatufaga Tutusa, ma faataatiaese i le teugatupe so o se tufatufaga e le i tapaina, lea e le o noatia ai le Pulega po o le tagata ua laiseneina e faagaoioia masini e faamaumau ai peti taitasi, e tufatufaina atu i lalo o lenei Vaega.
- (2) So o se paleni o tupe o lo o i ai i so o se Teugatupe o Tufatufaga Tutusa o tausia i lalo o lenei fuaiupu e ao ona faaliliuina atu i le teugatupe o tupe maua a le Pulega i le faaiuga o tausaga faatausitusi taitasi.
- (3) O Tulafono Faatonutonu ua faia i lalo o lenei Tulafono e mafai ona faatonuina ai so o se mataupu e uiga i le faavaeina ma le faagaoioia o Teugatupe o Tufatufaga Tutusa, ma so o se mataupu e faasino i tupe o totogi i totonu ma tupe o totogi mai i le teugatupe.

VAEGA 5

TAALOGA LOTO A LE ATUNUU

- 23. O le aia tatau a le Pulega e faafoe ai le taaloga loto a le atunuu:**
- (1) E i ai i le Pulega le aia tatau e faafoe ai le tasi po o le sili atu o taaloga loto a le atunuu.
 - (2) E tatau ona faafoeina se taaloga loto a le atunuu i sea faiga e pei ona manatu le Pulega ua talafeagai ai.
 - (3) E aunoa ma le faatapulaaina o le faafuaiupu (2), e mafai e le Pulega ona fuafua e tusa ai ma so o se taaloga loto a le atunuu:
 - (a) o auala e ao ona taaalo ai i le loto;
 - (b) o faailoga e totogi mo le taalo ai;
 - (c) o le fuainumera ma aofaiga o faailoga e ao ona tufatufaina;
 - (d) o ituaiga pepa faataga po o lisiti e molimauina ai le taalo i se taaloga loto;
 - (e) o le fua faatatau o le komisi po o isi totogi e ao ona totogiina i lala sooupu o lo o latou faatauina atu pepa;
 - (f) o ponesi (pe a i ai) e ao ona totogi atu i lala sooupu o lo o faatauina atu pepa ua malo;
 - (g) o aofaiga e ao ona faaalu i le lolomiina o pepa faataga ma faasalalauga faatosina mo le loto.
 - (4) O tupe uma o faailoga e malo e taulimaina e i latou ua faamanuiaina i so o se taaloga loto e tuusaunoa atoa mai lafoga o tupe maua.
 - (5) Afai e le i faamautuina e se tagata sana talosaga i se faailoga i so o se taaloga o le loto a le atunuu, e faamalieina ai le Pulega i totonu o le ono (6) masina i le tuanai ai ona tuuina mai le faasalalauga o taunuuga o le seiina o le lūlū, o le a tagofia e le Pulega tupe o lea malo e faapei ai o se vaega o tupe totoe mai tupe maua o le Loto, ia e mafai ona taofia e le Pulega, peitai o le pule faitalia a le Pulega, e mafai ai ona faatagaina i le tuanai ai ona muta le aogā o lea ono (6) masina, ona totogi le aofai o le faailoga mai tupe e le o tufatufaina a le Pulega, i so o se tagata o ia lea ua faamalieina le Pulega e faapea e agavaa o ia i ai.

24. Lala sooupu e faatauina atu pepa:

- (1) E mafai ona tofia e le Pulega sooupu e faatauina atu pepa mo taaloga loto faamaonia a le atunuu, i luga o ia tuutuuga e pei ona fuafuaina e le Pulega.
- (2) O komisi po o isi totoi e agavaa i ai sooupu e faatauina atu pepa, e ao ona totogiina e le Pulega mai tupe na maua mai le faatauina atu o pepa o taaloga loto.

25. Tupe alu lautele:

E mafai ona totogi atu mai tupe a le Pulega, ia aofaiga e fuafuaina e le Pulega mo tulaga nei:

- (a) tupe uma o faailoga e totogi e tusa ai ma taaloga Loto faamaonia a le atunuu;
- (b) so o se komisi po o isi tupe e totogi atu i sooupu e faatauina atu pepa;
- (c) so o se ponesi e totogi i tagata na latou faatauina atu pepa ua malo;
- (d) tupe alu uma ua faatupulaia i le faafoega o taaloga loto faamaonia a le atunuu, e aofia ai tau e faasino i le lolomiina o pepa loto ma, mo faasalalauga faatosina o taaloga loto a le atunuu ua faamaonia.

VAEGA 6**LŪLŪ****26. Faafoega o lūlū:**

- (1) E ao ona laiseneina se lūlū e tusa ai ma lenei Tulafono ma faafoe i le faiga ua fuafuaina e le Ofisa Sili o Pulega, o ia lea i le faatinoga o malosiaga uma i lalo o lenei Vaega, e ao ona faaaogā so o se faiga faavae po o se faagasologa e talafeagai ma lūlū ia ua faamaonia e le Pulega.
- (2) E aunoa ma le faatapulaaina o le faafuaiupu (1), e i ai i le Ofisa Sili o Pulega le pule faataga e fuafua ai, faamaonia ma faaaogā so o se tasi o mataupu nei e tusa ai ma so o se lūlū:
 - (a) o le fuainumera o pepa mo le lūlū;
 - (b) o le tau e totogi mo pepa;

- (c) o le fuainumera ma aofaiga o faailoga e ao ona tufatufaina atu;
 - (d) o ituaiga pepa;
 - (e) o le fua faatatau o komisi po o isi totogi e ao ona totogi i sooupu o faatauina atu pepa;
 - (f) o ponesi (pe a i ai) e ao ona totogi i sooupu e faatauina atu pepa ua malo;
 - (g) o aofaiga e ao ona faaalu i le lolomiina o pepa ma faasalalauga faatosina o le lūlū.
- (3) E mafai ona faia Tulafono Faatonutonu i lalo o lenei Tulafono e faatonuina ai so o se manaoga e talafeagai i lūlū ua laiseneina po o, i le faafoega ma le faatonutonuina faaletulafono o le lūlū.
- (4) E i ai i le Ofisa Sili o Pulega le pule faataga e fuafua ai le faiga e tagofia ai faailoga o se lūlū e le i tapaina po o e le i tufatufaina atu.

27. Laisene o lūlū:

- (1) E ao ona faia se talosaga mo le faamaoniga e faafoe ai se taaloga lūlū, i le Ofisa Sili o Pulega ma faamalieina manaoga uma nei:
- (a) e ao ona faia i le pepa faatumu faamaonia ma tuuina atu faatasi ma totogifuapauina faamaonia;
 - (b) e ao ona tuuina atu faatasi ma se faamatalaga faamaonia faatagaina;
 - (c) e ao ona faailoagofie le faalapotopotoga lea e tuufaatasia le lūlū, po o ai e faamanuia ai i tupe maua o le lūlū;
 - (d) e ao ona filifili se sui faatagaina o le faalapotopotoga;
 - (e) e ao ona tuuina atu faatasi pe lagolagoina e ala i so o se faamatalaga e manaomia e le Ofisa Sili o Pulega, ma so o se faamaoniga o le faamatalaga ua tuuina atu e faamalieina ai le Ofisa Sili o Pulega.
- (2) I le noatia ma le fai fuafua i le faafuaiupu (3), e i ai le pule faataga i le Ofisa Sili o Pulega e faamaonia pe teena se talosaga mo se laisene o le lūlū.

- (3) E lē tatau i le Ofisa Sili o Pulega ona tuuina atu se Laisene i lalo o lenei fuaiupu vagana ai ua faamalieina le Ofisa Sili o Pulega e faapea, o tupe mama o le lūlū ua taua e faaaogā mo na o se faamoemoega faatagaina e tusa ai ma le faamatalaga faamaonia o le faamoemoega faatagaina o le lūlū.
- (4) E i ai le pule faataga a le Ofisa Sili o Pulega i le tuuina atu o se laisene i lalo o lenei fuaiupu, e faaee atu ai ia tuutuuga e fuafuaina e ia.
- (5) E i ai le pule faataga a le Ofisa Sili o Pulega e faalēaogāina ai se laisene ua tuuina atu i lalo o lenei fuaiupu.

28. Auala e seiina ai lūlū:

E ao ona seiina se lūlū i sea faiga ua faatonuina e le Ofisa Sili o Pulega.

29. E lē seiina se lūlū vagana ai ua maea ona faatau uma atu pepa lūlū:

- (1) E lē tatau ona seiina se lūlū vagana ai ua maea ona faatauina atu pepa lūlū uma.
- (2) E lē faaaogāina le faafuaiupu (1) pe afai ua faamalieina le Ofisa Sili o Pulega e faapea, ua leiloloa pepa e le i faatauina atu i le taimi na auina atu ai i se sooupu e faatauina atu po o, ua lē mafai ona faatauina atu, ma e i ai le pule faataga a le Ofisa Sili o Pulega e faataga ai le seiina o le lūlū, i le noatia ma fai fuafua i ia pepa lūlū ua vavae ese mai le se'i.
- (3) E i ai le malosiaga o le Pulega e tuusaunoa ai le tausisia o le faafuaiupu (1), pe afai o i ai mafuaaga faapitoa mo le faatagaina o le seiina o le lūlū e aunoa ma le faatauina atu uma o pepa, ma e mafai ona faaaogā so o se tuutuuga po o manaoga, pe a tuuina atu sea faatagaga.

30. Ia auai leoleo i le seiina o le lūlū:

Vagana ai ua tuusaunoa e le Ofisa Sili o Pulega, e ao ona seiina se lūlū i le auai faatasi o ni leoleo se toalua (2), ma o se tasi o ia leoleo, e tatau ona umia se tofiga e le i lalo ifo i lo o le tofiga o le satini sinia.

31. Ia avanoa tagata lautele e molimauina le seiina o le lūlū:

O le seiina o se lūlū e ao ona tatala i tagata lautele, ma e faasalalauina faalauaitetele le taimi ma le nofoaga e seiina ai, po o le logoina atu i se faiga ua faamaonia e le Ofisa Sili o Pulega.

32. Taunuuga aloaia:

- (1) E ao i se tagata ua laiseneina, i le taimi lava e maea ai ona seiina le lūlū, ona ia saunia se faamatalaga faamaonia e faatulaga ai taunuuga o le sei; ma tuuina atu lea faamatalaga i le Ofisa Sili o Pulega i totonu o le 48 itula talu ona maea seiina le lūlū.
- (2) O le faamatalaga ua saunia i lalo o le faafuaiupu (1) e tataua ona faapea o taunuuga aloaia o le sei, i le taimi lava e faamaonia ai e le Ofisa Sili o Pulega, ma e ao ona totogi atu faailoga pe tufatufaina atu e tusa ai ma lea taunuuga.
- (3) O le taunuuga aloaia o le seiina o so o se lūlū e ao ona faasalalau faalauaiteteleina, po o le logoina atu i se faiga e faatonuina e le Ofisa Sili o Pulega.

33. Soligatulafono e faasino i lūlū:

- (1) O se tagata o ia lea ua ia faamaopoopoina po o faalauiloa, pe fesoasoani i le faalapopotoga po o le uunaia o le faia o se Lūlū e lē laiseneina, ua ia faia se soligatulafono ma e noatia i luga o moliaga ua faamaonia faaletulafono i se sala tupe e lē silia le 100 iunite tau faasalaga, po o le nofosala i le falepuipui mo se vaitaimi e lē silia le tausaga e tasi (1), po o faasalaga uma e lua.
- (2) O se tagata ua laiseneina po o isi tagata e nafa ma le faafoega o se lūlū ua laiseneina, o ia lea ua ia lē usitaia se tuutuuga e faaaogā i le laisene, ua ia faia se soligatulafono ma e noatia i luga o moliaga ua faamaonia faaletulafono i se sala tupe e lē silia le 50 iunite tau faasalaga, po o le nofosala i le falepuipui mo se vaitaimi e lē silia le tolu (3) masina, po o faasalaga uma e lua.

34. Faatauina atu o pepa lūlū faasolitulafono:

E mafai e se tagata o ia lea ua ia faatauina mai se pepa mai se lūlū e le i laiseneina, ona talosaga mo le toe faafoi mai o lana tupe, po o isi tau e totogi mo le pepa, mai le tagata e fitoitonu i ai le lūlū e le i laiseneina.

VAEGA 7 TAALOGA BINGO

35. Talosaga mo laisene o taaloga bingo:

- (1) E ao ona faia se talosaga mo le faamaoniga e faafoe ai bingo lea o lo o faatino ai taaloga eseese tau tupe e i latou o auai, i le Ofisa Sili o Pulega, ma e tatau ona faamalieina manaoga uma nei:
 - (a) e ao ona faia i se pepa faatumu faamaonia ma tuuina atu faatasi ma le totogifuapauina faatonuina;
 - (b) e ao ona tuuina atu faatasi ma se faamatalaga o se faamoemoe faatagaina ua faamaonia;
 - (c) e ao ona faailoa mautinoa le faalapotopotoga lea o le a faamaopoopoina le bingo, po o ana faamanuiaga mai tupe maua o le bingo o le a faaaogāina;
 - (d) e ao ona filifili se sui faatagaina o le faalapotopotoga;
 - (e) e ao ona tuuina atu faatasi po o le lagolagoina e so o se faamatalaga o manaomia e le Ofisa Sili o Pulega, po o so o se faamaoniga o faamatalaga ua tuuina atu e faamalieina ai le Ofisa Sili o Pulega.
- (2) I le noatia ma le fai fuafua i le faafuaiupu (3), e i ai le pule faataga a le Ofisa Sili o Pulega e faamaonia ai pe teena se talosaga mo se laisene bingo, ma e ao ona tuuina atu le laisene i le igoa o le sui filifilia faatagaina.
- (3) E lē tatau i le Ofisa Sili o Pulega ona faamaonia se laisene i lalo o lenei fuaiupu vagana ai ua faamalieina o ia e faapea, o tupe mama mai le bingo ua talosagaina e faaaogā mo na o se faamoemoega faatagaina, e tusa ai ma le faamatalaga o se faamoemoe faatagaina ua faamaonia e faaaogā i le bingo.

- (4) E i ai le pule faataga a le Ofisa Sili o Pulega e faaee atu ai tuutuuga pe a faamatuu atu se laisene i lalo o lenei fuaiupu.
- (5) E i ai le pule faataga a le Ofisa Sili o Pulega e faalēaogāina ai se laisene e tuuina atu i lalo o lenei fuaiupu.
- (6) E lē faatagaina se tagata e faafoe se taaloga bingo, po o le fesoasoani i le faafoega o se taaloga bingo, lea o lo o taaalo ai tagata i taaloga eseese tau tupe, vagana ai e tusa ai ma se laisene ua faamatuu atu i lalo o le faafuaiupu (1).

36. Tulaga lē aloaia o se laisene:

O se laisene e faia ai se taaloga bingo ua faatatauina e lē toe aloaia pe afai e faaaogā so o se tasi o itu nei:

- (a) e leai se faamatalaga ua tuuina atu i le Ofisa Sili o Pulega, e pei ona manaomia e le fuaiupu 41;
- (b) e leai se taaloga bingo o faia e tusa ai o lea laisene i totonu o se vaitaimi ua fuafuaina e le Ofisa Sili o Pulega i le taimi na faamatuu atu ai le laisene, po o i so o se taimi ina ua maea ona tuuina atu.

37. Ia faia ni laisene o tagata o tuuina atu oloa ma auaunaga tau bingo:

- (1) E ao ona laiseneina se tagata o ia lea o tuuina atu oloa ma auauanga tau bingo mo le faamoemoe e faafoe ai se taaloga bingo i lalo o lenei Vaega.
- (2) E ao i se tagata ua faamoemoe e tuuina atu oloa ma auaunaga tau bingo ona talosaga i le Ofisa Sili o Pulega mo se laisene e faataga ai sea faatauga po o le tuuina atu, ma e i ai le pule faataga i le Ofisa Sili o Pulega e faamatuu atu ai pe teena le laisene.
- (3) E i ai le pule faataga i le Ofisa Sili o Pulega e faaee atu ai ia tuutuuga e talafeagai ma se laisene na tuuina atu i lalo o lenei fuaiupu.
- (4) E i ai le pule faataga i le Ofisa Sili o Pulega e faalēaogāina ai se laisene na tuuina atu i lalo o lenei fuaiupu mo so o se mafuaaga ma luga o so o se faapogai.
- (5) So o se kamupani o lo o tuuina atu oloa ma auaunaga tau bingo e ao ona i ai se faiga e faatonutonu ai ia oloa ina ia faigofie ona sueina ai pepa ua auina mai i totonu o Samoa.

- (6) Ua faia se soligatulafono e se tagata, o ia lea ua ia solia le faafuaiupu (1) po o le (5), ma e noatia i luga o moliaga ua faamaonia faaletulafono:
- (a) i le tulaga o se kamupani, o se sala tupe e lē silia le 50 iunite tau faasalaga; po o
 - (b) i so o se isi lava tulaga, o se sala tupe e lē silia le 20 iunite tau faasalaga.
- (7) Mo faamoemoega o lenei fuaiupu, “oloa tau bingo” o pepa malo, pepa ma so o se meafaitino po o masini o lo o faaogāina mo le faafoega o le taaloga bingo.

38. Tofia o le tagata e faamaopoopoina:

O se faalapotopotoga na tuuina atu i ai se laisene i lalo o lenei Vaega e ao ona tofiaina se toatasi (1) po o le sili atu o ona sui auai, a o le i faafoeina so o se taaloga po o le faatulagaga o viliga o le bingo, po o se tagata e valaau e ofo fua mai, o ia lea e le o se sui o le faalapotopotoga, e avea ma tagata ua tofia e faamaopoopoina ma valaau, na te faafoeina le taaloga po o le faatulagaga o viliga o le bingo.

39. Faamatalaga faapitoa e manaomia e le Ofisa Sili o Pulega:

- (1) E ao i se tagata e faamaopoopoina ua tofia i lalo o le fuaiupu 38 ona tuuina atu i le Ofisa Sili o Pulega le faasilasilaga a itiiti mai e fitu (7) aso atoatoa e uiga i tulaga nei:
- (a) o le aso, taimi ma fale ua faatulaga mo le faafoega o le taaloga bingo;
 - (b) o itula o le a faafoe ai le taaloga;
 - (c) o tau faaee atu ua fuafua e faia mo pepa taalo taitasi po o le tulaga e mafai ai ona taalo i se taaloga;
 - (d) o le maualuluga o faailoga (e aofia ai faailoga o tupe faatupulaia) ua fuafua e tuuina atu ma le maualuga o le komisi ua fuafua e faaee atu;
 - (e) o le igoa ma tuatusi o tagata o i latou ia o le a nafa ma le faafoega o taaloga ma tuuina atu faamatalaga o tupe maua i lalo o le fuaiupu 41;

- (f) o le igoa ma le tuatusi o le tagata e valaau po o tagata e valaau o le a faaaogāina;
 - (g) o faamaoniga e faapea ua maea ona maua mai oloa tau bingo, mai se tagata ua laiseneina e tuuina atu oloa tau bingo.
- (2) I le tulaga i le faagasologa o faatulagaga o bingo e umi atu i lo le vaitaimi na faamaonia - o le vaitaimi e aogā ai se laisene, ua lava atoatoa ona usitaia le faafuaiupu (1) pe afai ua tuuina atu se faasilasilaga se tasi o lo o faailoa ai faamatalaga faapitoa manaomia e tusa ai ma faatulagaga uma, ia lē itiiti ifo na i le fitu (7) aso atoatoa a o lumanai ai le aso o le faatulagaga muamua.

40. Tuutuuga o le taaloga:

- (1) E mafai e le Pulega ona faia tulafono faafoe e talafeagai ma tuutuuga o le taalo ai i le bingo.
- (2) E tatau i se tagata o lo o faafoeina se faatulagaga o bingo ona faaavanoa tulafono faafoe mo asiasiga pe a talosagaina.
- (3) O tulafono faafoe ua faia i lalo o lenei fuaiupu ua faatatauina e avea ma tuutuuga e faaaogā i laisene taitasi uma ua faamatuu atu i lalo o le fuaiupu 35.
- (4) Afai ua tulai mai ua solia se tulafono faafoe ua faia i lalo o lenei fuaiupu i se bingo, ua faia e le tagata o umia le laisene na tuuina atu i lalo o le fuaiupu 35 mo lea bingo se soligatulafono, ma e noatia i luga o moliaga ua faamaonia faaletulafono i se sala tupe e lē silia le 5 iunite tau faasalaga.

41. Faamatalaga o tupe maua ma tupe totogi:

- (1) E ao i se tagata o umia se Laisene na tuuina atu i lalo o le fuaiupu 35, ona tuuina atu i le Ofisa Sili o Pulega se faamatalaga i le pepa faatumu faamaonia e auiliili ai tupe maua ma tupe totogi e tusa ai ma lea taaloga po o ia taaloga.
- (2) E ao ona tuuina atu se faamatalaga i lalo o lenei fuaiupu e tusa ai ma so o se tuutuuga e talafeagai i le laisene, po o i so o se taimi e manaomia ai e le Ofisa Sili o Pulega le tuuina atu o lea faamatalaga.

- (3) E ao ona tuuina atu se faamatalaga faaiu i lalo o lenei fuaiupu i totonu o le 14 aso ina ua muta le aogā o le laisene.
- (4) Ua faia se soligatulafono e se tagata o umia se laisene na tuuina atu i lalo o le fuaiupu 35, o ia lea ua ia lē tausisia lenei fuaiupu, ma e noatia i luga o moliaga ua faamaonia faaetulafono i se sala tupe e lē silia le 10 iunite tau faasalaga.

42. Faamaumauga ma faamatalaga molimau o le faafoega o bingo:

- (1) Mo taaloga bingo taitasi uma e faafoeina, e ao i se tagata o umia se laisene na tuuina atu i lalo o le fuaiupu 35, ona tausia se faamaumauga tusitusia o mataupu uma nei:
 - (a) o le aofai o pepa taalo na tuuina atu, po o faatagaga e taalo ai;
 - (b) o le aofai o le tupe na manaomia le totogiina e tagata taitoatasi mo pepa taalo taitasi po o le faatagaga;
 - (c) o le aofai o faailoga tupe na totogi, e aofia ai so o se tupe faaputupu;
 - (d) o le komisi na maua.
- (2) O ia faamaumauga tusitusia e ao ona teuina e le tagata ua laiseneina mo se vaitaimi ia lē itiiti ifo i le 12 masina, mai le aso na faafoe ai le taaloga, po o i le tulaga o le faagasologa o taaloga, mo se vaitaimi e lē itiiti ifo i le 12 masina mai le aso na faafoe ai le taaloga mulimuli o le faagasologa o taaloga;
- (3) O faamaumauga uma ua tausia i lalo o lenei fuaiupu e ao ona avanoa mo suesuega a le Ofisa Sili o Pulega po o se tagata asiasi.
- (4) E i ai i se tagata asiasi le pule faataga e faia ai tulaga uma nei e faasino i taaloga eseese tau tupe i taaloga bingo:
 - (a) ia ulufale atu i so o se fale o lo o faafoe ai se taaloga bingo, po o i totonu o se taimi talafeagai pe a maea le taaloga;
 - (b) ia suesueina so o se mea faigaluega, tusi o lo o faamaumau ai faamatalaga tau tupe, faamaumauga po o isi pepa aloaia;
 - (c) ia tapa mai so o se tagata o lo o ia faafoeina nei taaloga ni faamatalaga e fesootai i ai taaloga e pei ona manatu le tagata asiasi ua talafeagai ai.

VAEGA 8
POLOKALAME E FAALAUILOA AI LE FAATAUINA
ATU O OLOA MA AUAUNAGA

43. Faafoega o polokalame faalauiloa e faatauina atu ai oloa ma auaunaga:

- (1) I totonu o lenei Vaega, o se “polokalame e faalauiloa ai le faatauina atu”, o lona uiga o taaloga eseese tau tupe o lo o faaaogāina e se tagata na faavaeina, tagata na te tufatufaina atu po o lē na te faatauina atu oloa ma auaunaga ina ia faalauiloa ai le faatauina atu o ia oloa po o auaunaga, ma o tulaga nei e lua e faaaogāina:
 - (a) o le auai i le polokalame e manaomia ai se tagata e faatauina mai oloa po o auaunaga;
 - (b) o le taunuuga e fuafua i filifiliga i taimi eseese po o le faalagolago atoa lava i matematega, po o ua na o se vaega e ala i matematega (tusa lava pe tele pe itiiti se sao o matematega) ma i se vaega e ala i le faaaogāina o le tomai po o le agavaa.
- (2) Ina ia aiaia faaletulafono se polokalame e faalauiloa ai le faatauina atu ma mo le faatagaina i se laisene le faamatuu atu o le polokalame i lalo o lenei Vaega, e faaaogā tulaga uma nei:
 - (a) o le auai i le polokalame e lē tatau ona manaomia ai se tagata e faatauina mai oloa po o auaunaga ua faalauiloa mo se faailoga lea e sili atu na i le tau masani e faatau taitasi ai;
 - (b) e ao ona manino le aso po o le vaitaimi lea e, po o le a fuafuaina ai le taunuuga o le polokalame i tagata auai i le taimi ma le nofoaga e faatau atu ai;
 - (c) e lē tatau ona manaomia se tagata o auai i le polokalame na te totogiina atu i se auala tuusao pe leai foi ni tau, e ese ai na i lo le faatauina mai o oloa po o auaunaga ua faalauiloaina e ave ma o latou tau masani taitasi;
 - (d) o le taunuuga e ao ona filifilia i taimi eseese po o le faalagolago atoa lava i matematega, po o ua na o se vaega e ala i matematega (tusa lava pe tele pe itiiti se sao o

matematega) ma i se vaega e ala i le faaaogāina o le tomai po o le agavaa.

- (3) O manaoga e mafai ai ona auai i se polokalame e faalauiloa ai le faatauina atu, e ao ona ogatasi ma lenei fuaiupu, ma e noatia i le faamaoniga a le Ofisa Sili o Pulega.
- (4) O se tagata o ia lea ua ia faalauiloaina pe faafoeina se polokalame faalauiloa o le faatauina atu, lea ua lē usitaia ai le faafuaiupu (2), ua ia faia se soligatulafono ma e noatia i luga o moliaga ua faamaonia faaletulafono i se sala tupe e lē silia le 100 iunite tau faasalaga, po o le nofosala i le falepuipui mo se vaitaimi e lē silia le ono (6) masina, po o faasalaga uma e lua.
- (5) E ao ona laiseneina se polokalame e faalauiloa ai le faatauina atu, ina ia tusa ai ma lenei Vaega, ma faafoe i le faiga ua fuafuaina e le Ofisa Sili o Pulega, o ia lea i le faatinoga o malosiaga uma i lalo o lenei Vaega, e ao ona faaaogāina so o se faiga faavae po o se faagasologa e talafeagai ma polokalame faalauiloa mo le faatauina atu, lea e faamaonia e le Pulega.
- (6) E mafai ona faia Tulafono Faatonutonu i lalo o lenei Tulafono, e faatonuina ai so o se manaoga e talafeagai i polokalame ua laiseneina e faalauiloa le faatauina atu po o le faafoega ma le faatonutonuina faaletulafono o le faalauiloaina o le faatauina atu.
- (7) E i ai i le Ofisa Sili o Pulega le pule faataga e fuafua ai le faiga e tagofia ai faailoga e le i tapaina po o e le i tufatufaina atu i le polokalame faalauiloa o le faatauina atu.

44. Laisene o polokalame faalauiloa o le faatauina atu o oloa ma auaunaga:

- (1) E ao ona faia i le Ofisa Sili o Pulega se talosaga mo le faamaoniga e faafoe ai se polokalame e faalauiloa ai, ma e ao ona faamalieina manaoga uma nei e lua:
 - (a) e ao ona faia i se pepa faatumu faamaonia ma tuuina atu faatasi ma le totogifuapauina faamaonia;
 - (b) e ao ona tuuina atu faatasi po o le lagolagoina e so o se faamatalaga e manaomia e le Ofisa Sili o Pulega, ma so o se

faamaoniga o le faamatalaga ua tuuina atu, e faamalieina ai le Ofisa Sili o Pulega.

- (2) I le noatia ma le fai fuafua i le faafuaiupu (3), e i ai i le Ofisa Sili o Pulega le pule faataga e faamaonia ai pe teena se talosaga mo se laisene o polokalame e faalauiloa ai le faatauina atu.
- (3) E i ai i le Ofisa Sili o Pulega le pule faataga i le tuuina atu o se laisene i lalo o lenei fuaiupu, e faaee atu ai ia tuutuuga e pei ona fuafuaina e ia.
- (4) E i ai i le Ofisa Sili o Pulega le pule faataga e faalēaogāina ai se laisene na tuuina atu i lalo o lenei fuaiupu.

45. Auala e seiina ai pepa ua faatau atu o polokalame faalauiloa:

- (1) E ao ona seiina pepa o polokalame faalauiloa i se faiga e pei ona faatonuina e le Ofisa Sili o Pulega.
- (2) E lē tatau ona seiina pepa o polokalame faalauiloa seia vagana ua usitaia o tuutuuga uma e talafeagai i lona faatinoga.
- (3) E ao ona seiina pepa o polokalame faalauiloa a o auai ai tagata, o i latou ia ua manaomia e le Ofisa Sili o Pulega ina ia auai ai mo le se'i.
- (4) E ao ona tatala le avanoa i le mamalu o le atunuu e auai ai i le seiina o pepa o polokalame faalauiloa, ma e ao foi ona faasalalau pe logoina le taimi ma le nofoaga o lea se'i i se faiga ua faamaonia e le Ofisa Sili o Pulega.

46. O faaiuga aloaia:

- (1) E ao i se tagata ua laiseneina, i le taimi lava e maea ai le se'i, ona saunia se faamatalaga ua faamaonia, lea ua faatulagaina ai le faaiuga o le se'i, ma ia tuuina atu le faamatalaga i le Ofisa Sili o Pulega i totonu o le 48 itula talu ona maea le seiina o pepa o polokalame faalauiloa.
- (2) O le a avea le faamatalaga ua saunia i lalo o le faafuaiupu (1) ma faaiuga aloaia o le se'i, i le taimi lava e faamaonia ai e le Ofisa Sili o Pulega, ma e ao foi ona totogiina atu faailoga pe tufatufaina atu ina ia tusa ai ma ia faaiuga.

- (3) E ao i faaiuga aloaia o le se'i o so o se polokalame faalauiloa ona faasalalau pe faasilasila i se faiga e pei ona faatonuina e le Ofisa Sili o Pulega.

47. O soligatulafono e faasino i pepa o polokalame faalauiloa:

- (1) O se tagata o ia lea ua faamaopoopoina po o ua faalauiloa, pe ua fesoasoani i le fuafuaina po o le faalauiloaina o pepa o polokalame o faalauiloa e aunoa ma se laisene i lalo o lenei Vaega, ua faia e ia se soligatulafono ma e noatia i moliaga ua faamaonia faaetulafono i se sala tupe e lē silia le 100 iunite tau faasalaga po o le nofosala i le falepuipui mo se vaitaimi e lē silia le tasi (1) tausaga, po o faasalaga uma e lua.
- (2) O se tagata ua laiseneina po o isi tagata ua fitoitonu i ai le faafoega o pepa o polokalame faalauiloa ua laiseneina, o ia lea ua lē mafai ona usitaia se tuutuuga ua talafeagai i le laisene, ua faia e ia se soligatulafono ma ua noatia i se moliaga ua faamaonia faaetulafono i se sala tupe e lē silia le 50 iunite tau faasalaga po o le nofosala i le falepuipui i se vaitaimi e lē silia le tolu (3) masina, po o faasalaga uma e lua.

VAEGA 9

O TAALOGA ESEESE TAU TUPE E FAAAOGĀINA AI KAMUPANI E TUUINA ATU AUAUNAGA TAU FESOOTAIGA

48. O taaloga eseese tau tupe e faaaogāina ai kamupani o tuuina atu auaunaga tau fesootaiga:

- (1) I lenei Vaega, seia vagana ua aliali mai se faamoemoe e ese ai:
 “faamatalaga faaeletoroni” o lona uiga o le tuuina atu o so o se faamatalaga o mea moni, talitonuga, faamatalaga (po o ni feau tusitusia faaeletoroni, leo po o ata, po o numera tatala e mafai ona faitauina po o faatonuga o masini) i se faiga talafeagai e mafai ai ona faatino se galuega i se faiga faaeletoroni;
 “faiga e toe faamaamulu ese ai” o lona uiga o se faiga e faatagaina ai se tagata o auai ai i se kamupani o lo o tuuina atu auaunaga, ina

ia lē toe auai ai, i le mauaina o feau tusitusia feaveai ua faapea ona faamalosia ai le auai o tagata i taaloga eseese tau tupe;

“kamupani o lo o tuuina atu auaunaga” o lona uiga o se tagata ua faatonuina faaletulafono e pei ona i ai i lalo o le Tulafono o Fesootaiga 2005, ina ia tuuina atu auaunaga tau fesootaiga i tagata lautele, po o i latou e ona po o faafoeina fesootaiga tau komepiuta o faaaogāina e tuuina atu ai auaunaga tau fesootaiga i tagata lautele i Samoa;

“masini tau fesootaiga” o lona uiga o se tasi o masini nei:

- (a) o se komepiuta ua faia i ai fetuunaiga mo fesootaiga e ala i le initaneti po o isi fesootaiga tau komepiuta;
- (b) o se televise ua faia i ai fetuunaiga e mafai ai e tagata matamata ona maua faamatalaga e ala i se laina o fesootaiga tau televise po o isi masini tau fesootaiga;
- (c) se telefoni;
- (d) so o se isi lava masini faaeletoroni po o se masini mo fesootaiga i nofoaga mamao.

- (2) O taaloga ma taaloga eseese tau tupe e ala atu i le faaaogāina o se masini tau fesootaiga ma faamatalaga faaeletoroni, e ao ona laiseneina e tusa ai ma lenei Vaega, ma e ao ona faafoeina i le faiga ua fuafuaina e le Ofisa Sili o Pulega, o ia lea, i le faatinoga o ia malosiaga uma i lalo o lenei Vaega, e ao ona faaaogāina so o se faiga faavae po o faagasologa e talafeagai i polokalame faalauiloa o le faatauina atu o oloa ma auaunaga, lea ua faamaonia e le Pulega.
- (3) E mafai ona faia Tulafono Faatonutonu i lalo o lenei Tulafono e faatonuina ai so o se manaoga talafeagai i taaloga ma taaloga eseese tau tupe ua laiseneina e ala i le faaaogāina o se masini tau fesootaiga ma faamatalaga faaeletoroni.
- (4) E i ai i le Ofisa Sili o Pulega le pule faataga e fuafuaina ai le faiga o le a tagofia ai tupe e le i tapaina po o faailoga e le i tufatufaina atu e faasino i taaloga ma taaloga eseese tau tupe ua laiseneina e ala i le faaaogāina o se masini tau fesootaiga ma faamatalaga faaeletoroni.

49. O laisene mo taaloga e faaaogāina ai masini tau fesootaiga:

- (1) E mafai e se tagata o lo o avea ma sui ua faatagaina a se tagata o tuuina atu auaunaga ona faia se talosaga i le Ofisa Sili o Pulega mo se laisene e faafoe ai taaloga po o taaloga eseese tau tupe e ala i le faaaogāina o se masini tau fesootaiga ma faamatalaga faaeletoroni.
- (2) E ao ona faia se talosaga i lalo o lenei Vaega i le pepa faatumu faamaonia ma tuuina atu faatasi ma le totogifuapauina ua faamaonia.
- (3) E ao ona tuuina atu se faamatalaga o gaoioiga eseese faatagaina ua faamaonia i le taimi e faia ai se talosaga i lalo o lenei fuaiupu.
- (4) E mafai e le Ofisa Sili o Pulega ona tapa lea faamatalaga ina ia tuuina atu e lagolagoina ai se talosaga, ma e ono manaomia le tagata talosaga ina ia tuuina atu faamaoniga o so o se mataupu e talafeagai ma le talosaga.

50. Faamatuuina atu o se laisene:

- (1) E mafai e le Ofisa Sili o Pulega ona faamatuu atu se laisene ua faia i lalo o lenei fuaiupu po o le teena o le faamatuuina atu o se laisene i lalo o lenei Vaega.
- (2) E lē tatau i le Ofisa Sili o Pulega ona faamatuuina atu se laisene i lalo o le faafuaiupu (1) seia vagana ai ua faamalieina le Ofisa Sili o Pulega e faapea, o tupe faasili uma mai se taaloga po o taaloga eseese tau tupe ua faaaogāina mo se faamoemoe ua faatagaina.
- (3) E mafai e le Ofisa Sili o Pulega ona faaee atu tuutuuga i so o se laisene ua faamatuuina atu i lalo o lenei fuaiupu a o faagasolo le vaitaimi o lo o faaaogāina ai le laisene.
- (4) E mafai e le Ofisa Sili o Pulega ona faalēaogāina se laisene ua faamatuuina atu i lalo o le faafuaiupu (1) i so o se taimi ma i luga o so o se mafuaaga, ma i le faia ai o sea faaiuga, e mafai e le Ofisa Sili o Pulega ona faaaogā so o se manaoga e talafeagai i le faamaapeina o gaoioiga ua laiseneina, ma le faiga o le a tufatufa pe tagofia ai tupe ma faailoga.
- (5) O se tuutuuga o se laisene ua faamatuuina atu i lalo o lenei Vaega ua faapea ona lē tatau ai i se tagata o tuuina atu auaunaga ua

laiseneina ona faafoeina taaloga po o taaloga eseese tau tupe mo tupe faasili faapisinisi, ma o tupe faasili uma foi, e ao ona faaaogāina i se faamoemoe ua faamaonia.

51. Tufatufaga o tupe faasili:

- (1) I le noatia ma le fai fuafua i le faafuaiupu (2), so o se tupe na maua a o faagasolo gaoioiga eseese ua laiseneina i lalo o lenei Vaega, e ao ona faaaogāina ia tusa ai ma le faamatalaga o faamoemoega faatagaina ua faamaonia, ma e ao ona maea le tufatufaina atu i totonu o le ono (6) masina, mai le taimi na mauaina ai tupe.
- (2) E mafai e le tagata o tuuina atu auaunaga ona talosaga i le Ofisa Sili o Pulega mo se tufatufaga mai tupe o tufatufaina i totonu o le ono (6) masina mai le aso na mauaina ai pe afai e manaomia ona faatupulaia tupe mo se vaitaimi ina ia maua ai se aofaiga tele o tupe mo se faamoemoega faapitoa o galuega fesoasoani.

52. Faamaoniga mo taaloga:

- (1) E ao i se tagata o tuuina atu auaunaga ua laiseneina ona tuuina atu taaloga taitasi o le a faaaogāina i lalo o le laisene, i le Ofisa Sili o Pulega mo se faamaoniga, ma o sea talosaga e ao ona tuuina atu ai o faamatalaga auiliili uma nei:
 - (a) le igoa o le taaloga;
 - (b) le aso na amata ai le taaloga ma le aso mulimuli na faatino ai;
 - (c) le pasene ua fuafuaina o le tupe e maua, lea o le a toe faafoi, e ala i le faia ai o faailoga tupe;
 - (d) auiliiliga o so o se totogifuapauina faamaonia ua totogi e le tagata o tuuina atu auaunaga mo le taaloga;
 - (e) o le faiga o le a faafoe ai le se'i, po o le fuafuaina ai o tagata e manumalo;
 - (f) auiliiliga o le faiga ma le taimi e lomina faasalalau ai faaiuga.
- (2) E ao i le tagata o tuuina atu auaunaga ona taofia o faamaumauga uma e talafeagai i se taaloga ua laiseneina mo se vaitaimi a itiiti mai e lima (5) tausaga.

- (3) E mafai ona fuafuaina ma faamaonia tulafono faafoe e faasino i taaloga taitasi, e le Ofisa Sili o Pulega mo so o se taaloga ua laiseneina.

53. O le toe faamaamulu ese mai taaloga:

- (1) E ao i se tagata o tuuina atu auaunaga ona faaavanoa se faiga e toe faamaamuluese ai tagata ua auai ai po o tagata o lo o faaaogāina se masini tau fesootaiga lea e mafai ona faaaogā mo se taaloga ua laiseneina.
- (2) Afai e faaaogāina e se tagata ua auai ai le faiga e toe faamaamulu ese ai mai taaloga, ma o lo o faaauau pea e le tagata talafeagai o tuuina atu auaunaga ona faamalositia le auai ai i taaloga eseese tau tupe e ala i le faaaogāina o faamatalaga faaeletoroni i lea tagata auai ai, ua faia e le tagata o tuuina atu auaunaga se soligatulafono ma ua noatia i luga o se moliaga ua faamaonia faaetulafono i se sala tupe e lē silia le 50 iunite tau faasalaga ma se isi faasalaga faaopoopo e 10 iunite tau faasalaga i aso taitasi e mauaina ai e le tagata auai o faamatalaga faaeletoroni ua uunaia ai le auai ai o le tagata i taaloga eseese tau tupe i le tuanai ai ona faaaogā e lea tagata le faiga e toe faamaamulu ese ai.

54. O soligatulafono e faasaga i lenei Vaega:

- (1) O se tagata, o ia lea ua faafoeina, po o ua fesoasoani i le faafoeina o so o se taaloga po o ni taaloga eseese tau tupe e ala i le faaaogāina o se masini tau fesootaiga ma faamatalaga faaeletoroni e aunoa ma lona umia o se laisene aloaia, ma faaaogāina i le taimi nei, lea na tuuina atu i lalo o lenei Vaega, ua faia e ia se soligatulafono ma ua noatia i luga o moliaga ua faamaonia faaetulafono:
- (a) mo se kamupani, o se sala tupe e lē silia le 500 iunite tau faasalaga; po o
- (b) i so o se isi lava tulaga, o se sala tupe e lē silia le 10 iunite tau faasalaga; po o
- (2) O se tagata ua laiseneina o ia lea ua faafoeina po o ua fesoasoani i le faafoeina o so o se taaloga po o taaloga eseese tau tupe e ala i le

faaogāina o se masini tau fesootaiga ma se faamatalaga faaeletoroni, ua solia ai se manaoga i lalo o lenei Vaega, po o se tuutuuga ua faasino i le laisene, ma e leai se isi faasalaga o lo o faatatauina ai i lalo o lenei Vaega, ua faia e ia se soligatulafono ma ua noatia i luga o se moliaga ua faamaonia faaletulafono:

- (a) mo se kamupani, o se sala tupe e lē silia le 500 iunite tau faasalaga; po o
- (b) i so o se isi lava tulaga, o se sala tupe e lē silia le 10 iunite tau faasalaga.

VAEGA 10

FAAFOEGA O FALE O FAIA AI TAALOGA ESEESE TAU TUPE

55. O fale mo taaloga:

- (1) I lenei Vaega, o “fale mo taaloga” ua aofia ai se fale, potu, nofoaga po o se avanoa, potu faapitoa mo taaloga faalilolilo o so o se ituaiga lea o lo o faaogāina mo taaloga po o taaloga eseese tau tupe e le o laiseneina i lalo o lenei Tulafono.
- (2) E lē tatau i se tagata ona faafoeina se fale mo taaloga
- (3) O se tagata, o ia lea ua na solia le faafuaiupu (2), ua faia e ia se soligatulafono ma ua noatia i luga o se moliaga ua faamaonia faaletulafono i se sala tupe e lē silia le 250 iunite tau faasalaga po o le nofosala i le falepuipui mo se vaitaimi e lē silia le 12 masina, po o faasalaga uma e lua.
- (4) O se tagata ua maua i totonu o se fale mo taaloga eseese tau tupe ua faia e ia se soligatulafono ma ua noatia i luga o se moliaga ua faamaonia faaletulafono i se sala tupe e lē silia le 5 iunite tau faasalaga, seia vagana ai o sea tagata sa i ai i lea nofoaga ona o se faamoemoega e tusa ai ma le tulafono.
- (5) O se tagata, o i ai se matafaioi i so o se itu tau pulega, tausiga po o le faafoega o se fale mo taaloga, ua faatatauina o ia e aveva ma tagata o tausia lea fale mo taaloga ma e noatia i se soligatulafono i lalo o le faafuaiupu (2).

- (6) Afai e maua so o se meafaigaluega po o se mea e faaaogā mo taaloga po o taaloga eseese tau tupe i so o se nofoaga ua masalomia e faapea, sa faaaogāina e ave ma fale mo taaloga, o le mauaina o ia meataitasi ua ave lea ma faamaoniga, seia vagana ai ua faamaonia i se isi faiga e ese ai:
- (a) e faapea o ia nofoaga o lo o faaaogāina e ave ma fale mo taaloga; ma
 - (b) e faapea o tagata na maua i totonu o le vaega o nofoaga, lea na maua ai i totonu o meafaigaluega po o se mea e faaaogā mo taaloga na taaalo ai i ia nofoaga.
- (7) E faaaogā le faafuaiupu (5) tusa lava pe lē i ai se taaloga na faatinoina i totonu o nofoaga i le taimi na mauaina ai meafaigaluega po o se mea e faaaogā mo taaloga.
- (8) E mafai e le Pulega po o tagata ofisa po o tagata asiasi po o leoleo ona osofaia faafuasei se fale mo taaloga ma e mafai ona faia so o se tasi o mea nei:
- (a) ia asiasi ma susesueina fale mo taaloga;
 - (b) ia taofia taaloga ma taaloga eseese tau tupe o faafoeina i totonu o fale mo taaloga.

56. Aitalafuina o tupe mo se fale mo taaloga:

O se tagata o ia lea ua aitalafuina po o ua tuuina atu i ai ni tupe mo le faamoemoe e faatuina ai, pe faatinoina ai le pisinisi o se fale mo taaloga, po o o ia lea ua faamanuiaina i tupe faasili mai le faatuina po o le faatinoina o sea pisinisi, ua faia e ia se soligatulafono ma ua noatia i luga o se moliaga ua faamaonia faaletulafono i se sala tupe e lē silia le 100 iunite tau faasalaga, po o le nofosala i le falepuipui mo se vaitaimi e lē silia le 12 masina, po o faasalaga uma e lua.

57. O le taalo i taaloga eseese tau tupe i nofoaga faitele:

- (1) O se tagata o ia lea ua maua o taalo i taaloga po o taaloga eseese tau tupe i se nofoaga faitele ua faia e ia se soligatulafono ma ua noatia i luga o moliaga ua faamaonia faaletulafono i se sala tupe e lē silia le 20 iunite tau faasalaga.

- (2) E mafai e se leoleo ona pueina faapagota e aunoa ma se tusi faapoloaiga se tagata ua maua o taalo i taaloga po o taaloga eseese tau tupe i totonu o se nofoaga faitele, ma e mafai ona faoa meafaigaluega ma masini uma ua faaaogāina mo taaloga ua maua i sea nofoaga faitele po o ua i ai i tagata ua pueina faapagota i lalo o lenei fuaiupu.
- (3) I so o se taulumaga mo se soligatulafono e faasaga i lenei fuaiupu, e mafai e le Faamasinoga ona faatonuina e faapea, ia faatamaia pe lafoaia meafaigaluega po o mea uma e faaaogā mo taaloga ua faoa i lalo o le faafuaiupu (2) e le Pulega.
- (4) Afai e faaaogāina so o se tupe po o isi mea taua i le taaloga o matematega po o taaloga o lo o fefiloi ai matematega ma agavaa i so o se nofoaga faitele, ua faatatauina le tagata taalo, seia vagana ai ua faamaonia i se isi tulaga e ese ai, sa taalo, po o na faapea ona taalo ai i taaloga.

VAEGA 11

SAILIILIGA, SUEINA O TUSI MA TUPE ALU UA FAAMAONIA

58. **Ia tuuina atu faamatalaga e tagata ua laiseneina:**

- (1) E ao i se tagata ua laiseneina ona faatino mea uma nei:
 - (a) tuuina atu pepa aloaia uma ua talosagaina e le Ofisa Sili o Pulega i totonu o le taimi ua manaomia e le Ofisa Sili o Pulega;
 - (b) faailoa atu i le Ofisa Sili o Pulega faamaumauga aloaia uma ua tapa e ala i ni faiga tusitusia;
 - (c) tuuina atu le igoa ma auiliiliga uma tau fesootaiga o so o se tagata o fesootai ma taaloga po o taaloga taaloga eseese tau tupe ua laiseneina, i lalo o le laisene;
 - (d) taofia faamatalaga auiliili o pepa ma isi meataitasi uma e talafeagai i taaloga ua laiseneina po o taaloga eseese tau tupe ua faatauina atu po o ua tuuina atu e le tagata ua laiseneina, e aofia ai igoa o so o se tagata, o ia lea na faatauina i ai pe na

tuuina atu i ai, faapea o latou faamatalaga auiliili tau fesootaiga ma tausaga o le tagata.

- (2) O se tagata ua laiseneina o ia lea ua lē mafaia ona usitaia le faafuaiupu (1), ua faia e ia se soligatulafono ma ua noatia i luga o se moliaga ua faamaonia faaletulafono i se sala tupe e lē silia le 100 iunite tau faasalaga.
- (3) O le lē tausisia o lenei fuaiupu, o se mafuaaga lea o le a mafai ai ona taofia lē tumau pe faalēaogāina se laisene e le Pulega.

59. Sueina o Tusi i Tulaga Lautele:

- (1) E mafai e le Pulega ona tuuina atu se faasilasilaga i se tagata ua laiseneina e manaomia ai lea tagata, i se taimi vave lava e talafeagai ai i le tuanai ai o le tausaga faaletupe ua taua i le faasilasilaga, ina ia sueina tusi o faamatalaga tau tupe, faamaumauga ma faamatalaga o taaloga po o taaloga eseese tau tupe a le tagata ua laiseneina mo lea tausaga faaletupe, e se tagata asiasi po o se suetusi ua faamaonia e le Pulega.
- (2) E ao ona tuuina atu e se tagata ua laiseneina o ia lea ua tuuina atu i ai se faasilasilaga i lalo o le faafuaiupu (1), faamatalaga tau tupe ua sueina i le Pulega i totonu o le taimi ua aiaia i le faasilasilaga.
- (3) E ao ona totogiina tau o le faatinoga o le sueina o tusi e pei ona aiaia i lalo o le faafuaiupu (1) e le tagata ua laiseneina.
- (4) O tupe uma na maua e ala i le sueina o tusi e faapea na mauaina e ala i taaloga eseese tau tupe na faia faasolitulafono, e tuuina atu lea i le Pulega.

60. E lē taofia komisi o tupe totogi:

- (1) I le noatia ma le fai fuafua i le faafuaiupu (2), e faasaina se tagata mai lona taofia o tupe po o ni meafaitino e mafai ona faaliu tupe ua maua mai i se taaloga eseese tau tupe seia vagana ai ua faamaonia e aveva, o se tupe alu ua faatagaina e le Ofisa Sili o Pulega.
- (2) E ao ona faamaonia se tupe alu faatagaina e le Ofisa Sili o Pulega a o lumanai ai lona faaaogāina e aveva ma sea tupe alu faatagaina mo se faamoemoe ua faamaonia.

- (3) So o se tagata o ia lea ua ia solia le faafuaiupu (1) ua faia e ia se soligatulafono, ma ua noatia i luga o se moliaga ua faamaonia faaletulafono:
- (a) mo se kamupani o se sala tupe e lē silia le 100 iunite tau faasalaga; po o
 - (b) mo se isi lava tulaga, o se sala tupe e lē silia le 50 iunite tau faasalaga.

VAEGA 12

FOFOGAINA O MATAUPU E LE PULEGA

61. Talosaga tetee ma le toe fofogaina o mataupu:

- (1) E mafai ona faatoai atu talosaga tetee i le Minisita ina ia toe iloilo ma faia i ai se faaiuga i luga o so o se faaiuga po o se gaoioiga ua taua:
 - (a) o se faaiuga ua faia e le Ofisa Sili o Pulega e teena ai se talosaga mo se laisene i lalo o lenei Tulafono;
 - (b) o se faaiuga a le Ofisa Sili o Pulega e teena ai lona faamaonia o se faamatalaga o faamoemoega ua faatagaina i lalo o le fuaiupu 10;
 - (c) so o se isi lava mataupu, lea ua aiaia ai i Tulafono Faatonutonu ua faia i lalo o lenei Tulafono, se aia tatau e talosaga tetee ai.
- (2) E mafai ona faia se talosaga i le Minisita ina ia toe iloilo so o se faaiuga ua faia e le Pulega i lalo o lenei Tulafono.
- (3) E ao ona faatoai atu i le Minisita talosaga tetee ma talosaga ua faia i lalo o lenei fuaiupu i totonu o le 30 aso mai le aso na faia ai le faaiuga po o le aso na tuuina atu ai se faasilasilaga i lalo o lenei Tulafono.
- (4) E ao i talosaga tetee ma talosaga ua faia i lalo o lenei fuaiupu, ona faia i le pepa faatumu faamaonia ia taua ai mafuaaga uma o le talosaga tetee po o le talosaga ua faia, ma e ao ona tuuina atu faatasi ma le totogifuapauina ua faamaonia.

- (5) E ao ona tuuina atu i se talosaga mo le toe fofogaina o le mataupu i lalo o le faafuaiupu (2), o faamatalaga talafeagai uma na le i mafai ona tuuina atu pe e le i maua i le taimi na faia ai le uluai faaiuga.
- (6) E mafai e le Minisita ona faia uma po o so o se tasi o mea nei:
 - (a) ia tapa le tuuina atu o faamatalaga faaopoopo e lagolago ai mafuaaga o le talosaga tetee po o le talosaga mo le toe fofogaina o le mataupu;
 - (b) ia faatonuina le faia o se asiasiga ma tuuina atu se lipoti e se tagata ofisa o le Pulega;
 - (c) ia teena le talosaga tetee ma faamautuina le faaiuga;
 - (d) ia faatumauina le talosaga tetee po o le talosaga ma suia pe toe fetuunai le faaiuga, ma faaopoopo so o se aiaiga ina ia usitaia e le tagata o lo o faia le talosaga po o le tagata talosaga.

62. Ia suesueina e tagata asiasi faasea:

- (1) E mafai e le Ofisa Sili o Pulega ma se tagata asiasi ona suesueina se faasea mai so o se tagata e faatatau i le faafoeina o so o se taaloga po o taaloga eseese tau tupe.
- (2) Afai, o se taunuuga o se suesuega, ua faamalieina ai o so o se tagata asiasi e faapea, sa mafai ona tulai mai se tasi o tulaga o lo o taua i le faafuaiupu (3), e ao i le tagata asiasi ona tuuina atu loa se lipoti tusitusia i le Ofisa Sili o Pulega.
- (3) O tulaga o lo o faasino i ai le faafuaiupu (2) e faapea:
 - (a) o le faafoega o so o se taaloga po o taaloga eseese tau tupe ua solia ai se tuutuuga o se laisene i lalo o lenei Tulafono, po o se tulafono faafoe ua faamaonia po o se tulaga faataatia e faasino i lea gaoioiga;
 - (b) ua solia lenei Tulafono po o so o se isi lava Tulafono;
 - (c) o sini o lenei Tulafono ua faamalieina e ala i gaoioiga tau taaloga.
- (4) Afai o se taunuuga o le lipoti a le tagata asiasi ua faamoemoe le Ofisa Sili o Pulega e faia ai se tagi e faasaga i se tagata ua laiseneina i lalo o lenei Vaega, e ao ona tuuina atu se ata o le lipoti ma

faamatalaga auiliili o le tagi ua fuafuaina e faia e le Ofisa Sili o Pulega i le tagata ua laiseneina.

- (5) E ao ona logoina le tagata o lo o tagi i le faaiuga o le suesuega ma so o se gaoioiga e faia ina ia tusa ai ma lenei fuaiupu.

63. Faalauiloaina o taaloga eseese tau tupe faatuatuaina:

- (1) Ua i ai i le Pulega le malosiaga e faafoe ai se suesuega i so o se taaloga po o taaloga eseese tau tupe po o faatinoga, ina ia faamautinoa ai le faalauiloaina o taaloga ma taaloga eseese tau tupe e faatuatuaina.
- (2) E mafai e le Pulega ona fuafuaina le faafoega o se suesuega i lalo o lenei fuaiupu e tusa ma lona lava manatu po o e tali mai ai i se faasea ua faia i ai, e ala i se faiga tusitusia, lea e ono i ai sona fesootaiga ma itu nei:
- (a) o se soliga ua tuuaia ai lenei Tulafono po o tuutuuga talafeagai i se laisene;
- (b) o le faiga o lo o faafoe ai, faagaoioi ai, po o faafoe ai gaoioiga eseese ua laiseneina, faatinoga po o nofoaga;
- (c) o amio a tagata o lo o aofia ai i le faatinoga, faagaoioiga po o le faafoega o taaloga po o taaloga eseese tau tupe, po o i latou o lo o faaaogāina ia auaunaga tau taaloga po o taaloga eseese tau tupe;
- (d) so o se isi lava mataupu ua fuafua le Pulega ina ia faataunuu le suesueina.
- (3) O se faasea e ao ona suesueina i lalo o le faafuaiupu (2), e mafai ona faasino i se faatinoga po o se gaoioiga e sili i le tasi, ua laiseneina, ma o le suesuega e mafai ona faalautele atu ina ia aofia so o se isi lava tagata ua laiseneina, pe afai ua manatu le Pulega ua talafeagai ai.

64. Suesueina o mataupu e faasino i faasea:

- (1) E ao ona tuuina atu i tagata uma o lo o faasea ma tagata ua laiseneina ua faapea ona aafia i le tagi se faasilasilaga o le taimi ma le nofoaga e suesueina ai le mataupu i lalo o lenei Vaega.

- (2) I le maea ai ona tuuina atu i tagata talosaga taitoatasi ma tagata ua laiseneina se avanoa talafeagai e susesueina ai a latou mataupu e faasino i a latou faasea, e i ai i le Pulega le pule faataga e faia ai so o se tasi o mea nei:
- (a) ia fetuunai pe faalēaogāina tuutuuga o le laisene;
 - (b) ia taofia lē tumau le laisene mo se vaitaimi ua faamaotiina e tusa ai ma lenei Vaega;
 - (c) ia faalēaogāina le laisene e tusa ai ma lenei Vaega;
 - (d) ia tuuina atu se timaiga ma se lapataiga i le tagata ua laiseneina;
 - (e) ia faaee atu se faasalaga e lē silia le 100 iunite tau faasalaga;
 - (f) ia teena le faasea ma leai se gaoioiga e faia e faasino i le laisene po o le tagata ua laiseneina.
- (3) E mafai e le Pulega ona faaee atu so o se tuutuuga o lo o i le laisene e tagofia ai mataupu ia ua fuafuaina e faapea ua alagatatau ai le faasea, e aofia ai tuutuuga e faalauiloa ai taaloga eseesa tau tupe faatuatuaina.

65. Taofia lē tumau o laisene:

- (1) I le tuanai ai o le susesueina o le mataupu i lalo o lenei Vaega, e mafai e le Pulega ona taofia lē tumau se laisene ua tuuina atu i lalo o lenei Tulafono pe afai ua faamalieina le Pulega e faapea, ua faaaogāina so o se tasi o itu nei:
- (a) ua solia e le tagata ua laiseneina se aiaiga o lenei Tulafono;
 - (b) ua solia e le tagata ua laiseneina se tuutuuga o le laisene;
 - (c) ua molia po o ua faamaonia se moliaga o le tagata ua laiseneina i se soligatulafono ua faia i lalo o lenei Tulafono po o so o se isi lava tulafono talafeagai.
- (2) E ao i le Pulega ona fuafuaina le vaitaimi e taofia lē tumau ai se laisene, ma e mafai foi ona fuafuaina e faapea, o le taofiga lē tumau e faaaogā pea seia vagana ai ua usitaia e le tagata ua laiseneina se faatonuga faapitoa ua tuuina atu e le Pulega.
- (3) Afai ua manatu ua talafeagai ona faia faapea, e mafai e le Pulega, e ala i se faasilasilaga tusitusia ona tuuina atu i le tagata ua laiseneina,

se taimi faaumiumi faaopoopo e taofia lē tumau ai le laisene mo se isi vaitaimi ua faamaotiina.

- (4) A o lumanai ai le faia o se gaoioiga i lalo o le faafuaiupu (3), e ao i le Pulega ona tuuina atu i le tagata ua laiseneina se avanoa talafeagai e suesueina ai lana mataupu.
- (5) So o se faaiuga ua faia e le Pulega i lalo o lenei fuaiupu, e ao ona faia i se faiga tusitusia i le tagata ua laiseneina e le Ofisa Sili o Pulega, ma o le faasilasilaga faalauaitelo o le taofiga lē tumau ma le vaitaimi e faaaogā ai, e ao ona tuuina atu e pei ona faatonuina e le Pulega.
- (6) E mafai ona tuuina atu se faasilasilaga o se solitulafono mo so o se soligatulafono lea ua poloaia ai le taofiga lē tumau i lalo o lenei fuaiupu, po o e mafai ona molia le tagata ua laiseneina mo so o se soliga.
- (7) E mafai e le Pulega ona faaee atu so o se malosiaga i lalo o lenei fuaiupu i le Ofisa Sili o Pulega.

66. Faalēaogāina o laisene:

- (1) I le tuanai ai ona faataunuu o le suesuega o se mataupu i lalo o lenei Vaega, e mafai e le Pulega ona faalēaogāina se laisene ua tuuina atu i lalo o lenei Tulafono pe afai ua manatu le Pulega o se itu lea e manuia ai tagata lautele.
- (2) E aunoa ma le faatapulaaina o le faafuaiupu (1), i le fuafuaina pe o se itu e manuia ai tagata lautele, ina ia faalēaogāina se laisene, e ao i le Pulega ona iloilo pe faaaogā so o se tasi o itu nei:
 - (a) ua solia e le tagata ua laiseneina se aiaiga o le Tulafono;
 - (b) ua solia e le tagata ua laiseneina se tuutuuga o le laisene;
 - (c) ua faamaonia faaletulafono se soligatulafono a le tagata ua laiseneina i lalo o lenei Tulafono po o so o se isi lava tulafono talafeagai;
 - (d) o tulaga aliae mai o sea soliga ua tatau ai ona faalēaogāina le laisene.
- (3) E faaopoopo atu i mataupu ua faatulagaina i le faafuaiupu (2), e mafai e le Pulega ona iloiloina so o se tasi o mataupu nei:

- (a) pe ua talafeagai ma alagatatau ona umia e le tagata ua laiseneina se laisene;
 - (b) pe ua talafeagai ma alagatatau nofoaga ua faaaogāina mo taaloga po o taaloga eseese tau tupe mo faamoemoega o le laisene;
 - (c) pe le o ogatasi faatinoga ma gaoioiga eseese ua laisene ma sini autu o lenei Tulafono, ina ia faalauiloa o taaloga eseese tau tupe faatuatuaina;
 - (d) o le uiga moni o le faasea ua faia i le Pulega e faasino i le tagata ua laiseneina.
 - (e) pe sa taofia lē tumau talu ai le laisene i lalo o lenei Tulafono.
- (4) So o se faaiuga ua faia e le Pulega i lalo o lenei fauiupu, e ao ona tuuina atu i se faiga tusitusia i le tagata ua laiseneina e le Ofisa Sili o Pulega, ma e ao ona tuuina atu se faasilasilaga faalauaitete e uiga i le faalēaogāina o le laisene e pei ona faatonuina e le Pulega.
- (5) E mafai ona tuuina atu se faasilasilaga tau solitulafono mo so o se soligatulafono, lea ua poloaina ai le faalēaogāina o le laisene i lalo o lenei fuaiupu, po o le moliaga faaetulafono o le tagata ua laiseneina mo so o se soliga.

VAEGA 13

AIAIGA E FAAMALOSIA AI

67. Faalavelaveina o tagata asiasi:

- (1) E lē tatau i se tagata ona faia ma le loto i ai ma e aunoa ma se mafuaaga talafeagai, ona faalavelaveina se tagata asiasi i le faataunuuina po o le faatinoga o ona malosiaga po o tiute i lalo o lenei Tulafono.
- (2) E lē tatau i se tagata ona ia teena:
 - (a) le ulufale o se tagata asiasi i so o se nofoaga lea ua tuuina atu i ai le malosiaga i le tagata asiasi, e ulufale ai i lalo o lenei Tulafono; po o

- (b) tuuina atu i so o se tagata asiasi so o se faamatalaga, tusi, pepa po o pepa aloaia ua talosagaina e le tagata asiasi i lalo o lenei Tulafono.
- (3) O se tagata, o ia lea ua solia lenei fuaiupu, ua ia faia se soligatulafono, ma:
 - (a) ua noatia i luga o se moliaga ua faamaonia faaetulafono i se sala tupe e lē silia le 5 iunite tau faasalaga mo se tagata e toatasi;
 - (b) ua noatia i luga o se moliaga ua faamaonia faaetulafono i se sala tupe e lē silia le 10 iunite tau faasalaga mo se kamupani.

68. O soligatulafono o le faaoloataua ma faamatalaga sese:

- (1) O se tagata, o ia lea ua tuuina atu ma lona iloa lelei se faamatalaga sese po o faamatalaga i se leoleo po o se tagata asiasi, a o faagasolo le faatinoga o tiute o lea tagata asiasi po o le leoleo, ua faia e ia se soligatulafono.
- (2) O se tagata, o ia lea ua faaoloatauaina po o ua taumafai e faaoloatauaina se leoleo po o se tagata asiasi a o faagasolo le faatinoga o tiute o lea tagata asiasi po o le leoleo, ua faia e ia se soligatulafono.
- (3) O se tagata ua faamaonia lana solitulafono i lalo o le faafuaiupu (1), po o le (2) ua noatia e faapea:
 - (a) mo tagata taitoatasi, o se sala tupe e lē silia le 50 iunite tau faasalaga po o le nofosala i le falepuipui mo se vaitaimi e lē silia le ono (6) masina, po o faasalaga uma e lua;
 - (b) mo se kamupani, o se sala tupe e lē silia le 200 iunite tau faasalaga.
- (4) Ua faia e se tagata asiasi po o se leoleo se soligatulafono, o ia lea ua ia taliaina ni faiga faaoloataua mai se isi tagata, a o faatino ona tiute, ma ua noatia i luga o se moliaga ua faamaonia faaetulafono i se sala tupe e lē silia le 50 iunite tau faasalaga po o le nofosala i le falepuipui mo se vaitaimi e lē silia le ono (6) masina, po o faasalaga uma e lua.

69. Faasilasilaga tau tulafono:

- (1) E mafai e se tagata asiasi po o se leoleo ona tuuina atu se faasilasilaga tau tulafono i se tagata o ia lea ua ia faia se soligatulafono i lalo o lenei Tulafono po o Tulafono Faatonutonu ua faia i lalo o lenei Tulafono.
- (2) O se faasilasilaga tau solitulafono ua tuuina atu i lalo o lenei fuaiupu e ao ona faia i se pepa faatumu ua faamaonia e le Pulega, lea e ao ona faamaotiina ai:
 - (a) le soligatulafono na mafua ai ona tuuina atu le faasilasilaga tau solitulafono;
 - (b) le aofai o le sala tupe; ma
 - (c) le tapulaa o le taimi e tatau ona totogiina ai le sala tupe.
- (3) E mafai ona tuuina atu se faasilasilaga tau solitulafono:
 - (a) e ala i le faao atu o le faasilasilaga, po o sona ata i le tagata tonu ua tuuaia i le faia o le soligatulafono tau le soliga; po o
 - (b) e ala i le lafoina o le faasilasilaga, po o sona ata, i le meli e faatuatusi i le tagata, i lona nofoaga o pisinisi po o lona tuatusi i le meli.
- (4) O se tagata, o ia lea ua tuuina atu i ai se faasilasilaga o le solia o le tulafono, e mafai ona:
 - (a) totogi le sala tupe e tusa ai ma le faasilasilaga, i totonu o le taimi ua faamaotiina; po o
 - (b) ua ia lē totogiina le sala tupe ae ua faaaogā le aia tatau a lea tagata e faamasinoina ai i le faamasinoga, mo soligatulafono ua tuuaia ai lea tagata.

70. Faasalaga o le soliga o le tulafono:

- (1) O le faasalaga o le a faamaotiina i se faasilasilaga o le soliga o tulafono e tatau ona i se aofaiga e tusa ma le tasi-vae-lima o le aofaiga aupito i maualuga o le sala tupe ua faatonuina mo le soligatulafono.
- (2) O le totogiina o le sala tupe i lalo o lenei Vaega, e ao ona faia i le Pulega.

71. Aogā o le totogiina o sala tupe:

- (1) O le totogiina o se sala tupe ua faamaotiina i totonu o se faasilasilaga o le solia o le tulafono ua lava lea ma totoe e faamatuu ai ni noataga tau solitulafono mo le soligatulafono ua faamaotiina i totonu o le faasilasilaga.
- (2) E lē tatau ona faamauina se moliaga e faasaga i le tagata ua tuuina atu i ai se faasilasilaga o le solia o le tulafono pe afai ua malie o ia e totogi le sala tupe ua faamaotiina.
- (3) Afai ua tuuina atu se faasilasilaga i se tagata e se leoleo ma se tagata asiasia mo le soligatulafono lava lea e tasi na tulai mai ia lava tulaga aliae mai e tutusa, o le totogiina o le sala tupe ua faamaotiina i so o se tasi o ia faasilasilaga o faaiuga mulimuli lea e faamatuu atu ai noataga a lea tagata, i lalo o ia faasilasilaga e lua.

VAEGA 14
AIAIGA ESEESE

72. O pepa faatumu ma totogifuapauina ua faamaonia:

- (1) E i ai i le Ofisa Sili o Pulega le pule faataga e faamaonia ai pepa faatumu mo so o se faamoemoega i lalo o lenei Tulafono.
- (2) E mafai e le Pulega ona fuafua totogifuapauina mo so o se faamoemoe i lalo o lenei Tulafono ma o lea totogifuapauina ua fuafuaina e noatia i le iloiloga ma le faamaoniga a le Komiti Faatino o Tupe Maua a le Atunuu i lalo o le Tulafono o le Pulega o Tupe a le Malo 2001.

73. Puipuiga faaletulafono mo tagata o faaaogāina malosiaga i lalo o lenei Tulafono:

E lē noatia le Pulega ma ona sui auai, Ofisa Sili o Pulega ma tagata asiasi faapea leoleo i so o se noataga tau le va ma tagata po o noataga tau solitulafono i so o se tagata ua aafia i le faatinoina faaletulafono o se malosiaga i lalo o lenei Tulafono po o Tulafono Faatonutonu ua faia i lalo o lenei Tulafono.

74. Tulafono Faatonutonu:

- (1) E mafai e le O Le Ao o le Malo, i le faia i luga o le fautuaga a le Kapeneta ona faia tulafono faatonutonu ua talafeagai mo, po o ua tusa ai ma le faatinoga o lenei Tulafono.
- (2) E aunoa ma le faatapulaaina o le faafuaiupu (1), e mafai ona faia tulafono faatonutonu mo itu nei:
 - (a) e faatonutonuina ai ituaiga taaloga eseese tau tupe ma taaloga ua taliaina, e ala i le tuuina atu o puipuigamalu, tuutuuga e faaaogāina, faatonutonuina o amioga ma e ala i so o se isi lava faiga;
 - (b) ia faaititia ma tagofia lamatiaga ua mafua mai po o ua faatulai mai i taaloga eseese tau tupe ma taaloga;
 - (c) faamalosia tulaga faasaina ua tuuina atu mo faiga faasolitulafono o taaloga eseese tau tupe ma taaloga;
 - (d) faalauiloa taaloga eseese tau tupe faatuatuaina;
 - (e) faaaogā faiga e faalauiloa ai le faamaoni ma le lē faaituau o taaloga eseese tau tupe ma taaloga ua faatagaina;
 - (f) ia tali atu i ma taofia soligatulafono ma faiga lē faamaoni e fesootai ma taaloga eseese tau tupe ma taaloga;
 - (g) ia faatonutonuina faaetulafono le faaaogāina o tupe maua mai taaloga eseese tau tupe ua faatagaina ma ia faamautinoa ua faapea ona talafeagai mo faamoemoega o tagata lautele;
 - (h) ia aiaia ai mo malosiaga faaopoopo mo asiasiga ma faiga e faamalosia ai;
 - (i) ia faatonuina isi ituaiga faailoga ia e lē tatau ona ofoina atu e faasino i ituaiga taaloga eseese tau tupe ma taaloga ua faatagaina;
 - (j) ia faatonuina totogifuapauina mo taaloga eseese tau tupe uma ua laiseneina i lalo o lenei Tulafono;
 - (k) ia aiaia so o se isi lava mataupu e faalauiloa ai sini o lenei Tulafono.

75. Aiaiga faasaoina ma aiaiga tau soloaiga:

- (1) O se laisene po o se pemitā na tuuina atu aloaia i lalo o Tulafono ua soloia ma ua faamamaluina i le amata faamamaluina o lenēi Tulafono, e faaaauau pea ona aloaia ma faamalōsia i lalo o aiaiga tutusa o lenēi Tulafono, seia oo i le taimi e faamutaina ai le aogā o le laisene po o ua faalēaogāina i lalo o lenēi Tulafono.
- (2) O faaiuga, iloiloga ma iugafono uma na faia e Komiti Faatino eseese i lalo o le Tulafono ua soloia ua faatatauina e aloaia ma e faaaauau pea ona aloaia ma faamamaluina seia vagana ai ua fuafuaina i se isi faiga e ese ai e le Pulega i lalo o lenēi Tulafono.
- (3) So o se soligatulafono ua faapea ona faia i lalo o Tulafono ua soloia, lea na faia a o lumanai ai le amata faamamaluina o lenēi Tulafono, e mafai ona molia i lalo o le Tulafono talafeagai ua soloia, ma aiaiga talafeagai o le Tulafono ua soloia, lea e talafeagai i sea moliaga, ua faatatauina e faapea e aloaia ma faamamaluina ma e aogā mo faamoemoega o sea moliaga.
- (4) E ui lava i so o se aiaiga o lenēi Tulafono, e mafai e le Pulega ona tuuina atu se faasilasilaga i so o se tagata o umia se laisene o aogā i le taimi nei po o se pemitā o faasaoina e lenēi fuaiupu, o manaomia ai lea talosaga e ao ona faia mo se laisene fou, e tusa ai ma so o se tualumaga po o manaoga e faaaogāina i lalo o lenēi Tulafono, ma e mafai ona faamaoti ai i le faasilasilaga le taimi e ao ona faia ai le talosaga ma le aso o le a muta ai pe faalēaogāina ai le laisene po o le pemitā ua faasaoina.
- (5) So o se tagata o faafoeina se gaioiga o taaloga eseese tau tupe lea e lē tusa ai ma le tulafono, i lalo o lenēi Tulafono, peitai, o lo o faaaogāina ai le laisene o i ai nei na tuuina atu i lalo o le Tulafono ua soloia, e ao ona faamutaina i totonu o le ono (6) masina, talu ona amata faamamaluina o lenēi Tulafono, ma e noatia ma fai fuafua i moliaga i le pule faitalia a le Pulega i totonu o le ono (6) masina, i le tuanai ai o le amata faamamaluina o lenēi Tulafono.

76. Soloia o Tulafono:

Ua soloia Tulafono nei:

- (a) Tulafono o Petipetiga (Sooupu o Masini e Faamaumau ai Peti Taitasi) 1990;
 - (b) Tulafono o Taaloga 1978;
 - (c) Tulafono o Lūlū a le Malo 1978.
-